

MADCOSËN DADA UAID

Bëyuc choshon Uanën Esus chote chiaid

(Mat 3.1-12; Duc 3.1-18; Uan 1.19-28)

¹ Madcos nebi. Nuquin Papan tantiampicpadquiec aton madombo Esus abi yacno matses yuedquid chote tauamboen chiaid bëda chuinu. Tantia.

² Abi aton mado Esus chiec onquiaid Nuquin Papan Isayas dada uamiampid nad iquec:

“Naden naimbique. Tantia, mado. Mibi chotequid chuibanquidba chomendambi. Aidën chuibanac ambi tantiaid icsa ënshun mibi cainquidombo iquendac, mado.

³ Shubu nibëdacnoshon comapenec onquequin mibi chotequid aidën chuibanendac naden:

Nuquin Icbo choeque.

Aid tantianu quequin mibi icsaid ëmbanta quequin mibi bëyuc chuiquidën mibi chotequid chuibanendac, mado,”

quequin aton mado chiec onquiaid Nuquin Papan Isayas dada uamiampid nec.

⁴ Aden chiampicpadquiequi Esus bëyuc chuitequid Uan chopondash. Shubu nibëdacno tabadquin comapenec onquequin chuibampondash. Mibi icsaid ënshun Nuquin Papan chiaid tantiaquin nabanta. Aden tantiaquidquo icsho mibi cuidenquo yec mibi icsaid Nuquin Papa bëpiscudendac quequin chuibampondash. Aden chuibanquimbi ambi chiacpadomboen naquid acten mentobampondash Uanën. ⁵ Aden Uanën chuibanubien matses dadpen tantianu quec choded-chodedpondash. Nidaid Udeya caid yacnoësh chopondash. Edusaden caid yacnoëshbidi

cho-choapondash. Cho-choash tabadquin tantiashien, Icsapobi, quec abi icsaid chiec utsi-utsiec onquecueded-pondash. Aden abi icsaid chuibanquidtedictsëqui Uanën acte Odan caidën mentobampondash. ⁶ Ambo iquec Uan nidaidën capuquid cameyo bu daëdcaid dasiuidquid niondash. Nidaidën capuquid yua bitsi nacnenaïd tsiuquid niondash. Shioshbimboecquid shuishun pequid niondash. Bacun chequid niondash. ⁷ Aidëmbi naden chuïbampondash: —Con tsyuecquid choendac. Aidi nada-tiambocquin naquidquïo nendac. Aidi bëdamboshëcquid icnuc ëbi icsaquid icsho ¿atotsieshun aid choec quequin chuiquidquïo Nuquin Papan icmïoshi? quec tsadebi. ⁸ Mibi acten mentoquid nebi; aidien abipadquïocquid aton Mayan menianquidquïo nendac —quepondash Uan.

Esus acten mentoaid

(Mat 3.13-17; Duc 3.21-22)

⁹ Adnubien ambi chian-chianaidquïo Esus chopondash. Nidaid Cadidia caid shubu dadpen icquid Nasaded caid yacnoësh chopondash. Adshobien Uanën Esus acten mentopondash. ¹⁰ Aden acten mentoac Esus pudundonobi abu bëcadoacnoëshquïo dëbimbimboec isadquid abipadquïocquid aton Mayan bede-bedequemboec Esusbëd icnuec budpondash. ¹¹ Aden budmetanec ambi bëcadoacnoëshi: —Mibentsëcquïobi icsho ëmbi tanti-aidquïo mibi nec, mado. Ëmbi bëdamboen isaidquïo mibi nec —quepondash aton Papa Esus chiec.

Esus Nuquin Papan chiaïd niacmenuequin Satanasën tanaïd

(Mat 4.1-11; Duc 4.1-13)

¹² Aden chuïbon budmeboed Mayanën: —Shubu nibëdacno nid —cac nidash Esus tsadpondash abentsëcquïobi. ¹³ Ambo tsadquïmbi ushë abentsëc nidmec utsi choaid abutometsëcquïec tabadpondash. Ambo tabadshobi Nuquin

Papan chiaid niacmenuequin tanu quianec mayan icsan icbo Satanas caid chopondash. Aden tanaqui niaquesambo yec tsadpondash. Adec tsadnubi nidpondash Satanas. Ambobi bëdi nibëdquid deon caid chedo icpondash. Ambo tsadshobi ambi uaido mayan bëdabon chochoshon nashumbededpondash.

Cadidia yacnoshon tauamboen chuibanaid

(Mat 4.12-17; Duc 4.14-15)

¹⁴ Ambo yuec tabadash Esus choambien isadaidpembo ancaquidën acten mentoanquid Uan bedmeshun quënën nauedmepondash. Uan nauedmiambi nidaid Cadidia caid yacno nidshun Nuquin Papa yacno shubu abentsëquën tabadte iquec quequin Esusën chuibampondash. ¹⁵ — Nuquin Papan chiampidpadquid abi yacno yuedanquid nëmbobi iqueque. Mibi icsaid ënshun ëmbi chiaid bëda tantiata —quepondash Esus comapenec onquec.

Ëbëd iquec cho Esusën abia caido

(Mat 4.18-22; Duc 5.8-11)

¹⁶ Aden chuibanashic chian Cadidia caid cuëman capupondash. Ambo capuquin Petedo Simombëdtan aton utsin Andedesën nëshaid acte nënebansho istuidpondash. Aid daëdi nuëcquid bedquid niondash. ¹⁷ Aden nuëcquid bednuen nëshaid nënesho isec: —Nëshaidën nuëcquid bedquid icboedi nëbi Nuquin Papa yacno yuedanquid iquec quequin chuitequid mibi icmembique. Ëbëd iquec cho —quepondash Esus. ¹⁸ Adsho tantiash nëshaid abëd icquid menianec abi chuiquidbëd nidanepondash.

¹⁹ Adanec udictsëc nidanequin Sebedeyon mado daëd Acobobëdta Uan Esusën istuidpondash. Aidon aton nëshaid nacnempondash cano antabëdquin. ²⁰ Aden nacnensho isun Esusën ambi utsi chuibocpadomboen

chiaquien aid daëdshuntsen aton papabëd aton yua cano antabëdsho nianec Esusbëd nidanepondash.

Mayan icsa Esusën dapuduemiaid
(Duc 4.33-37)

²¹ Adashic chian Cadidia caid yacnoësh nidequi shubu dadpen icquid Capednaun caid yacno Esusbëd icquido chopondash. Choash chonoadtemaid ushë icnuc ënapen capuenquio yec Nuquin Papan chiaid chuibante shubun puduedpondash. Puduedshun iccuededquido Nuquin Papan chiaid Esusën chuipondash. ²² Aden chuisho tantiaashun: —Ambia tantiaquidën chiacpadomboen Esusën chuibanec. Utsimbien adomboen chienquio iccosh —quec onquec tabadcuededpondash. ²³ Aden Esusën chuisho tantianubien mayan icsa dapuduedaid tsadacnoëshquiobi comapenec onquiampondash: ²⁴ —Esus Nasaded yacnoësh choquid mibëd icquidpenquio nebique. Nidec nid. ¿Chian anëdënquiacno ëbitedi nidmenuecta cho? Nuquin Papan Madombo icsaisa nec quequin ëmbi tantiaid mibi nec —quec mayan icsa dapuduedtsaid onquepondash. ²⁵ Adoaquien: —Otacquoio tabad —quetanquin: —Dapuduen —capondash Esusën. ²⁶ Adoac comapenec abi dapuduedaid uëdëquenuc sidquianec dapuduempondash.

²⁷ Adsho isash: —¿Abimbodambi ispo? ¿Mitsipadquidquio nepec? Ambi tantiamiaid utsien nechitec. Chuiquidën nacpadomboen naid nec. Dapuduen, ambi cac ambi chiacpadomboen mayan icsan naic —quec onquecuededpondash Esusën naid chiec. ²⁸ Adec onquecuededash auëshquio nidaneshun ambi isboed, Esusën naid, chuibampondash. Aden chuibansho nidaid Cadidia caid yacnocquidtedishuntsen tantiabededpondash.

Simonën nachi bédamiaid
(Mat 8.14-15; Duc 4.38-39)

²⁹ Ambi chuisho tantiaboedo nidanenubien Petedo Simon caidën shubu yacno Esus Acobo Uan aidtedi nidpondash. Aidën shubun icquidbidi aton utsi Andedes icpondash. ³⁰ Aidën shubun icquidbidi Simonën nachi icpondash. Ambo Simonën nachi chumbo yec uepondash. Ambobi Esus chosho isun utsin chuipondash chumbo iquec quequin. ³¹ Aden chiaquien Simonën nachi yacnombo choshon Esusën mëdinquin uëtsëndoac abi chumbo yaid badedquio bédampondash. Adec bédanash nidtoшон codocashun abi choquidtedi pemebampondash Simonën nachin.

Esusën dadpen bédamiaid
(Mat 8.16-17; Duc 4.40-41)

³² Adnubien inchëshbudtsëqui Capednaun caid yacnocquidën daicsaidtedi bë-bëpondash. Adembidi mayan icsa dapuedaidtedi bë-bëpondash. ³³ Bë-bëash Simonën shubu shëcuë cuëmano puduedabi tabadcuededpondash. ³⁴ Adsho isun daicsaidtedi Esusën bédamebampondash. Adembidi mayan icsa dapuedaid dapuduemebampondash oncamenquiocquin. Nuquin Papan Madombo abi yacno yuedmianquid abentsëcquiobi mibi nec quequin chuinushe qeshun oncamenquiocpondash.

Shubu nibëdacno Nuquin Papabëd onque Esus onquiaid
(Duc 4.43-44)

³⁵ Adashic badiadte anoentsëqui yanubi isucunanec puduanec shubu nibëdacno Esus nidpondash. Nidec tabadtuidshun Nuquin Papabëd onquequin chuibampondash. ³⁶ Esus nidacshobi isucunshun Petedo Simombëd icquidën nibënampondash. ³⁷ Aden nibënquin istuidashi: —Mibi isec cho-choquidtedishun mibi nibëmbededec — quepondash Esus caic.

³⁸ Adoaquien Esus: —Capucuenequin utsibotsen Nuquin Papan shubu abentsëquën yuedanquid iquec quequin chuibenec chobique. Shubu utsi-utsiec dadpen yacno nidnu. Nid —quepondash. ³⁹ Aden chuibidanec nidaid Cadidia caid yacno capuequi shubu dadpen yacno choshon Nuquin Papan chiaid chuibante shubun puduedshun Nuquin Papa yacno shubu abentsëquën yuedanquid iquec quequin chuibampondash. Adembidi shubu dadpen icquid utsi-utsiec yacno choash puduedshun adomboembidi chuioapondash. Adembidi mayan icsa dapuduemeoapondash.

Nami mishac tantiadenquiocquid bëdamiaid

(Mat 8.2-4; Duc 5.12-13)

⁴⁰ Aden Esusën chuibanubien daushac bimboecquid nami mishac tantiadenquiocquid chopondash. Esus yacno choash: —Dada icsambo iquebique. Mibi adquid tantiaquid icquin ëbi bëdame —quequin Esus chiec comapenec cuëdpondash.

⁴¹ Adec cuëdshobi nëid isash unësquio iquebi quequin ëquëducshun tantiaquin mishec Esus: —Mibi bëdamembique. Bëdambo icta ⁴² —quenubi daicsaid nibëdquio yec bëdampondash.

⁴³ Aden bëdametanquin nidmepondash: —Nidec nid.

⁴⁴ Nidquimbi, Esusën bëdamioshi quequin chuituidenda. Naden nata. Edusaden yacno nidash Nuquin Papa tabadte shubu uashunaid yacno nidec puduedta. Ambo puduedshun min dada bëdambo icquin anocquid, Nuquin Papa matses chiec onquianequid, isme. Adoshon dëbimbiecquid daëd meneta Moisesën chiacpadomboen ma anocquidën napanueshun. Aden meniac abentsëc cuesuneshun utsi cuesunenu quenquiocquid cuesunaidën intac puntanequin intac mibi daseccashun dëbimbiecquid utsi cuemeshun naden aidën mibi chuipec.

Nuquin Papan mibi bēdamboen istiapimbochoedi nēbi bēdamboen mibi isendac. Aden chuiquin mibi bēdamiaid Nuquin Papan naid nec quequin tantiatsiash — quepondash Esus ambi bēdameboed chiec. ⁴⁵ Adsho tantiaboshombi niacbidanquin Esusēn bēdamioshi quequin chuibenepondash. Aden chuibanac Esus yacno matses dadpen cho-chopondash. Adec cho-chosho isash shubu dadpen icquid yacno Esus tabadtiaipimbo yec shubu nibēdacno capupondash. Adnubien Esus nibēnec nidaid utsiutsiec yacnoēsh dadpen cho-chopondash.

2

Cuembo yec uishquiaid Esusēn bēdamiaid

(Mat 9.2-8; Duc 5.18-26)

¹ Adashic Capednaun yacno nidoash shubun puduedpondash Esus. Adnubien, Esus chosh qesho tantiash padpidec dadpen cho-choapondash. ² Dadpen cho-choash puduedash tsucus-tsucustsēcquoio yec tabadnubi adecbidi shēcūē cuēmano tabadpondash. Adec tabadsho isun Esusēn Nuquin Papa yacno shubu abentsēquēn tabadte iquec quequin chuibampondash. ³ Adnubien cuembo yec uishquiaid bēc dada daēddaēdquiec 4ted cho-chopondash. ⁴ Cho-choshon matses tsucus-tsucustsēcquoio yec tabadsho isun dectatoshon macano nacnenaid chic-chictanquin Esusēn dayunquoio uishquiaid imbudpondash. ⁵ Aton dayunquoio imbudsho isun Esusēn bēdamec quequin abi imbudboedēn tantiec quequin ambibi tantiapondash Esusēn. Adashic: — Mado, mibi cuidenquoio yec mibi icsaid bēpiscudobi —quepondash Esus.

⁶ Adnubien isadaidbo tsusedpabon nadomboen nata quequin chiaid tantiamequidon ambobi tabadquin naden onquenquiocquin icsamboen tantiapondash. ⁷ ¿Atotsi

quish adec Esus onquepeque? Tantianu. Nuquin Papa icsamboen chuiquidien aid nechitec. Nuquin Papauidi matses cuidenquoio yec abi icsaid bēpiscudquid nec, quet-sēcquiec tabadpondash.

⁸ Aidon tantiaid tantiec nadpondash Esus: — ¿Atotsieshun aden mimbi icsamboen tantiape? ⁹ ¿Mibi cuidenquoio yec mibi icsaid bēpiscudobi quequin ěmbi chiaidquoio bēdantequidpenda nedic? Adecbidi, ¿Mibi icsamboeboedi mibi bēdanoque. Nidtoшон mibi imbudboed chiadtoshon buanec nid quequin ěmbi chiaid bēdantequidpembidida neoadic? ¹⁰ Ai, adquidquibidi nec. Mibi cuidenquoio yec mibi icsaid bēpiscudobi queboed chidon tishac matses yanaid yequi chuiquidquoio Esus nec quequin tantiesabo mibi nepec. Adquid icsho ěbi tantiamenuquin ¹¹ cuembo yec uishquiaid naden chiembique Tantia. Mibi icsambocboedi mibi bēdamiombique. Nidtoшон mibi imbudboed chiadtoshon buanec nid —capondash Esusēn. ¹² Adoquien nidtoшон abi imbudboed chiadtoanquin buampondash. Aden buansho isash: —Nideque. Is. Adomboen nasho isamboccondambi —quetsēcquiec onquish Nuquin Papan naid nec quec cuēdēncuededpondash.

Ĕbēd iquec cho Esusēn Debi caid

(Mat 9.9-13; Duc 5.27-32)

¹³ Adashic padpidec chian Cadidia caid cuēmano nidoapondash Esus. Ambobi tabadnubien aidēn chiaid tantianuec matses dadpen cho-choapondash. Cho-choasho isun Nuquin Papan chiaid chuibanoapondash Esusēn. ¹⁴ Aden chuibanec nidquimbi Debi, Adpeon madombo, tsadsho istuidpondash. Aidi Mateyobidi

cuënondash. Nidaid utsi yacno aton na utsibon buanbuansho isun piucquid bedshunquid Debi nepondash. Adembidi nidaid utsi yacnoshon aton na bë-bësho isun piucquid bedshunoaquid Debi nepondash. Isadaidpembo ancaquidën, Con matsespembon piucquid bedshunta, cac bedshunoaquid Debi nepondash. Adshobien: —Ëböd iquec cho —Esusën cac: —Ai, miböd nidnu. Nid —quianec badedi Esus tsibananec Debi nidpondash.

¹⁵ Adshumbic Debin shubuno nidshun Esusböd icquidon pepondash. Ashunquiobidi aton na buansho isun piucquid bedshunquid Debipadquidën utsinutsinquien pepondash. Ashunquiobidi isadaidbo tsusedpabon nadomboen nata quequin chiaid naisan utsinutsinquien pepondash. Debin shubuno Esus tsibanec choquid dadpen icpondash. ¹⁶ Aden adquidbëdtan Esusën pesho isun isadaidbon nadomboen nata quequin chiaid tantiamequid padiseyobo caid: —¿Atotsieshun piucquid bedshunquidbëdtambi isadaidbon nadomboen nata quequin chiaid naisabëdtambi mibi chuiquidën pepec? Tantiyanu. Ëbi chui —quepondash padiseyobo Esusböd icquido chiec.

¹⁷ Adsho tantiashien Esus: —¿Dada bédambocquidta dauëchoquidën bédametequid nedic? Padenquio. Daicsaidien dauëchoquidën bédamec. Adquiecbidi, icsaisa nebi quequin ambibi tantiaquid icsho mibi icsaid ënta. Aden ënash ëböd icquid mibi iquendac quequin chiesa nebi. Icsaquid nebi queshun mibi icsaid ënta. Aden ënash, ëböd icquid mibi iquendac quequin chuiquid nebi —quepondash Esus.

*¿Atotsi quiash miböd icquid buna mëmunesa nec? quiaid
(Mat 9.14-17; Duc 5.33-39)*

¹⁸ Adnubien abi chuiquid quënën nauedan aid tantiec unësquiocquin Uan acten mentoanquidböd icquidën

buna mēmunubi padiseyobobēd icquidon unēsaid tantiec unēsquiocquin buna mēmunoapondash. Aden buna mēmunsho isanec nidequi Esus yacno nidash Esusbēd icquidon buna mēmunenquio icsho isash utsibo: — ǃAtotsieshun Uambēd icquidon adembidi padiseyobobēd icquidon buna mēmunubi mibēd icquidon buna mēmunenquio icpec? Tantianu. Chui —quepondash.

¹⁹⁻²⁰ Adoaquien Esus: —Aton chido bednun pambid meniac chidon codocacsho abi inquidēn abēd icquido menec. Aden meniac isuidesa abēd icquido nec. Adecbidi ēbi abi chuiquid icnuc ēbēd icquidon buna mēmunenquiocquin isuidenquio iquec. Yuecash chido inquid nibēdanan abēd icboedo unēsquiocquin buna mēmunquin isuidpec. Adecbidi ēbi nibēdanan ēbēd icboedo unēsquio yampec.

²¹ “Adembidi dashcute shēnibēdta chucambocquid bētuscaisa matses nec. Shēnibēdta chucambocquid bētuscatsaid amēec canchedoaic. Adecbidi abi icsaid ēnesa tantiaid bēda pausudtiapimbo yec icsabudec. ²² Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic. Chodo shēnin icsa sandoshon nequid bēenquiocquin. Adecbidi Nuquin Papan tantiacpadec pausudnu qeshun mibi icsaid ēnacsho isun Nuquin Papan pausunendac — quepondash Esus.

Chonoadtemaid ushē icbo nebi quiaid
(Mat 12.1-8; Duc 6.1-5)

²³ Adnubien chonoadtemaid ushē utsi icnuc ēnapen capuenquiocquin tied matanquin adosbiecquid trico caid ēshē bedshun Esusbēd icquidon pepondash. ²⁴ Adshobien: —Mibēd icquido is. Chonoadtemaid ushēn chonoadeque. Abi chuiquid mibi iquec ǃatotsi quiash, Padi. Chēn, quenquio ique? —quepondash padiseyobo Esus caic.

²⁵ Adoaquien Esus: —¿Chuiquid Dabidbëd icquidon natia bunquin ambi petemaid pepondash quequin dada uapampid tantiamboda icconda? ²⁶ Nad icpampic. Abëd icquidobëd yuec capuash Dabid comapenec bundopampic. Bundoash Nuquin Papa tabadte shubu uashunaid yacno choash puduedtemaid quënën puduedshun Nuquin Papa tantianuequin pan meniac sanaid bedshun ambi petemaid abëd icquidobëdtambi abi chuiquidën Dabidën pepampic. Puduedtemaid quënën puduedquid, Nuquin Papa matses chiec onquianequid, Abiatad abentsëqui icnubi aid quënën puduedshun bedshun Dabidën pepampic. Abiatadpadquidën peteuidtsëqui nec quenquiocquin abëd icquido tantiaquin pan bedshun aidobëdtambi pepampic chuiquid dapa Dabidën —quepondash Esus padiseyobo caic.

²⁷ Aden chuishumbic naden padiseyobo Esusën chuiopondash: —Nabanash tiboedte matses bumpec quequin tantiaquin abitedi uabanquin ënashini con pabëdi tiboquepampic. Adashic yuecash, Chonoadtemaid ushë nec, quepadenebi con pabëdi. Aden chiequi matses tiboedte ushë aton icbo ictiapimbo iquec. ²⁸ Aid ushë icbo icquin ëbëd icquidon bunquin pebededsho isash, Padi. Chonoadtemaid ushë neque. Aden penda, quenquiocobi —quepondash Esus abi chieshënquido padiseyobo chiec.

3

Mëuesadaid Esusën bëdamiaid (Mat 12.9-14; Duc 6.6-11)

¹ Adashic padpidec Nuquin Papan chiaid chuibante shubun Esus puduedpondash. Ambo dada mëuesadaid tsadnubi ² Esus chieshënquid padiseyobo dadpen tabadpondash. Adec tabadec, Nëbi chonoadtemaid ushë icnuda

Esusën mëuesadaid bédamepeque. Nëid badiadën bédamesho isun bedmeshun quënnë nauedmenu quetsëc-
quiec padiseyobo tabadcuededpondash. ³ Aden tantiec
padiseyobo tabadnubien mëuesadaid chuiquin Esusën: —
Nënantanquio nidto —capondash.

⁴ Adoac nënantanquio nidtoash mëuesadaid
nidnubi iccuededquido chiec Esus onquepondash:
—¿Chonoadtemaid ushën matses tantiaquindambi
nape? ¿Adoenquiocquin matses icsa uapendambi
ique? ¿Nëid ushëndambi matses bédamepe?
¿Bédamenquiocquindambi cuesunepa? —quepondash.
Aden chiec Esus onquenubien onquenquio yec
tabadpondash padiseyobo.

⁵ Adoaquien nëishtanquimbi abi chieshënquido
bëisbanec Esus, Nuquin Papan chiaid tantiabanquin
naisa yec pausudtiapimbo icquido nec, abibi quiashic,
Unësquio iquebi, quec tsadpondash. Adec tsadquin
mëuesadaid chuiquin Esusën: —Ëbi mëd —cac mëdequi
bédampondash. ⁶ Adosho isash puduenanec nidquin
edodesbo padiseyobon badedquio istuidpondash. Aido
istuidash: —Esus cuesunete mibi bunacpadquiec bunebi.
¿Mitsipadentsimbi cuesunemenuen bedmepeba? —
quecuededpondash padiseyobo.

Esus yacno matses dadpen choaid

⁷ Adnubien Esusbëd 12ted icquido chian Cadidia caid
yacno nidoapondash. Adnubien nidaid Cadidia caid
yacnoësh utsibo dadpen cho-choapondash. ⁸ Adnubien
Esusën nabansho isboedon chiac nidaid Udeya caid
yacnocquido dadpen cho-chonobi adecbidi Edusaden
yacnocquido cho-chonobi adecbidi Idumeya yacnocquido
cho-chonobi adecbidi acte Odan caid uquë cuëma
utsiucquido cho-chonobi adecbidi shubu dadpen

icquid Tido caid yacnocquido cho-chonobi adecbidi shubu dadpen icquid Sidon caid yacnocquido cho-chopondash. Esus yacno ambi nabanaid utsibon chuisho tantiash cho-chopondash. ⁹ Adec cho-choash tsucus-tsucustsēcquio yec tabadquin tsicatiac nēnantanquio tsadacnoēshi catashnushe quiash Esus: —Cano bec cho —quiampondash abēd icquidquio caic. ¹⁰ Dadpen bēdamiosh cadoshe. Ēbitsen bēdanu quequin ambibi tantiaquin Esus mishbededpondash. ¹¹ Adembidi tantiaquin mishnuec mayan icsa dapuduedaid choquin Esus istuidequi uebudec comapenec sidquianec: —Nuquin Papan madombobi mibi nec —quec comapenec cuēdpondash. ¹² Adoquien: —Padi. Aden ēbi chienda —quepondash Esus.

*Abēd 12ted icquid Esusēn tantiamenu caid
(Mat 10.1-4; Duc 6.12-16)*

¹³ Adashic macuēsh dapa yacno nidnushi abēd 12ted icquido chomeshun nadopondash: ¹⁴ Ēmbi tantiac-padomboen mibitedi tantiamembi. Adquid icquin ēbēd tabadquin ēmbi chiacpadomboen mimbi tantiabenendac. Aden tantiabenacsho isun ēmbi chiacpadomboen chuimenuen mibitsen nidmembi. ¹⁵ Adembidi mayan icsa dapuduedaid dapuduequidbidi mibi icmembi quequin abēd icquido Esusēn chuipondash. ¹⁶ Ambi tantiamenu caid nēidtedi icpondash: Simon cashumbic Esusēn Petedo capondash, ¹⁷ utsibic Sebedeyon mado daēd, Acobobēd Uan. Aid daēdi, abu cuēdtequidēn mado nec quequin oncain Buanedquis quequin Esusēn cuēmpondash. ¹⁸ Utsibic Andedes, utsibic Uedipe, utsibic Badtodome, utsibic Mateyo cuēnshumbic Debi cuēmpondash. Utsibic Tomas, utsibic Acobo, aidi Adpeon mado nepondash. Utsibic

Tadeyo, utsibic Simon, aidi cananistabo caidbidi nepondash. ¹⁹ Utsibic Udas Iscadote, aidi abi chieshënquido Esus bedmenush Esusbëd capuquid nepondash. Aidedi Esusën tantamequin chuiquin ismiaido niondash.

Bedtsibu caidën dausunaid Esus nec quiaid

(Mat 12.22-32; Duc 11.14-23; 12.10)

²⁰ Aidedi chianec nidequi Esusbëd icquido shubun puduedpondash. Shubun puduednubien matses dadpen cho-choapondash. Adshobien Esusën Nuquin Papan chiaid chuibanubi Esusbëd icquidon penquio icpondash. ²¹ Aden penquiocsho isanec nidshun Esus yuedquid yacno choshon chuituidpondash. Aden chuituidac anocquidtsen Esus bednuec chopondash. Icsabudashien nec quianec chopondash.

²² Adomboembidi Esus icsabudec quequin icsamboen chuiquid utsibo icpondash. Isadaidbo tsusedpabon nadomboen nata quequin chiaid tantamequid chuiquid dapabo niondash. Aido Edusaden caid yacnoësh choquido niondash. Aido mayan icsa Esusën dapuduemesho isboed Esus chieshënquid yec nadpondash: —Mayan icsan icbo Satanas cashumbic Bedtsibu caidën tantamiaid Esus nec. Adquid icquin mayan icsa matses dapuduedaid dapuduemec —quepondash.

²³ Adoaquien Esus: —Mimbi icsamboen tantieque. Mibi chuibanu. Tantieq tabadta. ¿Mayan icsan icbo ambi dapuduedmiaid dapuduemequidta nepadic? Padenquio.

²⁴ Adquiecbidi shubu icbo abëd icquido cuëshëdmesa nec. ²⁵ Icbon abëd icquido cuëshëdmias shubu abentsëquën tabadtiapimbo iquendac. ²⁶ Adembidi ambi dapuduedmiaid dapuduemiash adquidën icbo ictiapimbo Satanas iquec. Icbo icnuequid abëd icquid puduemesa nec. ²⁷ Dadpenshun icbo Satanas nec. Adquid icquin ambi matses dapuduedmiaid dëniacanquidënuidquio

nadatiambocquin nabanquin cuemepec. Adquid icquin ëmbi nac mayan icsa dapuedaid Satanasën yua icboedi icbombo tantiec bëdambo yanec ëbëd iquendac. ²⁸Abimbo chiembique. Tantiata. Matses cuidenquiocquin abi icsaid bëpiscudquin paucquid Nuquin Papa nendac. Adecbidi Nuquin Papa icsamboen chuiboedi, Icsaobi, Papa, quesho tantiashun Nuquin Papan aid pauquendac. ²⁹Utsien Nuquin Papan Mayan abipadquidën tantiamiac nasho isun Satanasën naid nec quesho pauquenquio iquendac. Adquid ënëdenquio yec icsaquid nendac — quepondash Esus ³⁰Satanasën tantiamiac mayan icsa dapudemquid Esus nec abi caquido chiec.

Esus yacno aton utsibo anibëd choaid

(Mat 12.46-50; Duc 8.19-21)

³¹Adashic Esus yacno aton utsibo anibëd chopondash. Aido choshon matses dadpen nuntan tabadsho istuidash: —Ëbi choaid con mado chuita —quepondash utsi chiec. ³²Adoac puduedshun Esus nënantan tsadsho isun: —Titabëd min utsibo choshon umanucshun mibi isnuen cainec —quequin chuituidpondash. ³³Adoquien Esus: —Adquid utsi chuinu. Tantiata. ³⁴Në tabadquido ëbëd icquido neque. Is —quepondash Esus abëd iccuededquido chiec. ³⁵Adashic: —Nuquin Papan chiacpadomboen nabanquid ëbëd icquid nec. Adquid buchi caindambi. Adquid chido chuchu caindambi. Adquid utsi tita caindambi —quepondash Esus.

4

Tantiamequin pete ëshë nësecain chiaid

(Mat 13.1-9, 18-23; Duc 8.4-15)

¹Adashic padpidec chian cuëmano nidshun Esusën tantiamequin chuibanoapondash. Aden chuibanuc chochoquid dadpen icsho isash cano antabëdtopondash

cho-choquid acte cuëmano tabadnubi. ² Adec tabadshobi, matses nadquio iquec quequin tantiaquin tiedën caniquid ëshë Esusën tantiamequin naden chuibampondash: ³ —Tied icbo pete ëshë nësecanuec aton tied yacno nidquid. ⁴ Adec nësecanuec nidshun pete ëshë nësecac maisec pudun-pudunaid uicchunën chequid. ⁵ Adnubien nidaid cuënote dadpen samëdacno utsi-utsiec paëdash badedquio dëyucuidtsash ⁶ tapunenquio iquec ushën shoedec. ⁷ Adnubien pete ëshë utsi-utsiec nisanquid dëyucacno paëdash dëyucash canidoudtsacsho nisanquidën bëtinac podo sinash bacuëtiapimbo iquec. ⁸ Adnubien nidaid bëdambo yacno paëdaid dëyucaid caniaash dadpen pete ëshë icquid. Utsi-utsiec 30ted icnuc, utsi-utsiec 60ted icnuc, utsi-utsiec 100ted iquec — quepondash Esus.

⁹ Aden chiash: —Ëmbi chuiboed tantianu quiash bëdamboen tantiec papuduedta —quepondash Esus.

¹⁰ Aden chuibanash udictsëc Esusbëdi nidshun utsibo choenquiocsho isun databëdtuidquin abëd icquidon: —Mimbi chuibanboed tantianu. Ëbi chui —capondash Esus chuiquin.

¹¹ Adoaquien: —Nuquin Papan shubun tabadquid tanti-amendambi utsiboembi, Mibi nadquido iquec, quenquiocquin chuibanoc. ¹² Aden chiac:

“Nuquin Papan nabamboed isto-istoboedi ma padenquio tabadteneyoc.

Adembidi tantiado-tantiadoneboedi ma padenquio tabadteneyoc.

Aidon abimbo tantiaquin abi icsaid ëntsiandac. Aden abi icsaid ënsho isun cuidenquio yec Nuquin Papa abi icsaid bëpiscudtsiandac”

—quepondash Esus abëd icquido caic.

¹³ Aden chiashic: —¿Mimbitsen ěmbi chuiboed tantienquioda ique? Aidi tantienquiocquin ¿mitsipadentsi adomboembidi chuibansho mimbi tantiape? Ěmbi chuiboed nad iqueque. Tantia. Chuinu. ¹⁴ Pete ěshě sequidbimboecquid Nuquin Papan chiaid chuibanquidquio nec. Ěshě ambi siaidbimboecquid Nuquin Papan chiaid nec. Abi paědacno nidaidbimboecquid matsesěn tantiate nec. ¹⁵ Nidaiděn paědash pete ěshě dĕyuctiapimboesho uicchuněn chiaidbimboec matses utsi-utsiec iquec. Adquid Nuquin Papan chiaid tantiash papuduednu qesho Sathanasěn bĕpiscudmiac tantienquio yanec Nuquin Papa yacno puduedtiapimbo iquec. ¹⁶⁻¹⁷ Nidaid cuĕnote dadpen samĕdacno pete ěshě paědash badedquio dĕyucuidtsash tapunenquio yec ushěn shoedaidbimboec matses utsi-utsiec iquec. Adquid Nuquin Papan chiaid tantiavidash bĕdambo iquec queboedi ¿Esus tantiaquid nebi quecta icco? quequin utsibon mamĕnshunac badedquio tantiesa nebi quendac. ¹⁸⁻¹⁹ Nisanquid dĕyucacno pete ěshě paědash dĕyucash canidouidtsacsho nisanquiděn bĕtinac podo sinash bacuĕesabimboec matses utsi-utsiec iquec. Adquid Nuquin Papan chiaid tantiauidash abi bunaid, abi nĕnaid, abi icsaid aidtedi tantiaquin Nuquin Papan chiaid tantiesa yanshun bĕdamboec tabadaid ismesa yanec. Adquiděn Nuquin Papan chiaid tantiaquid utsi icmetiapimbo iquec. ²⁰ Ěshě utsibic nidaid bĕdambocquiděn paědash dĕyucash caniasash dadpen bacuĕ icquidbimboec matses utsi-utsiec iquendac. Adquid Nuquin Papan chiaid tantiadonec bĕdamboec tabadquin utsi ismequid nec. Aden ismiac Nuquin Papan chiaid tantiaquid daĕdpactsĕc yanubi utsin ismiac Nuquin Papan chiaid tantiaquid dadpen yanubi utsin ismiac Nuquin Papan chiaid tantiaquid dadpenquioshĕ yanendac —quepondash Esus abĕd icquido tantiamenuc.

*Tabote nēnantan nanac chēnquiacbimboec ictiad quiaid
(Duc 8.16-18)*

²¹ Aden chuishumbic abēd icquido naden Esusēn chuipondash: —¿Tabote icbon ambi dayun uaboed taboshon tsadte tēdion nanshun isaidta nedic? Adembidi ¿Tabote matsun bētashun isaidta neoadic? Padenquio. Nēnantan tabote nanac chēnquiacbimboec ismenu quec ictiad. ²² Adquiobidi abi yacno yuedanquid ambi dayun uapampidi nēbi Nuquin Papan dayun uainquiocquin ēbi chomeshun ismec. Adembidi con mado chuiban quenquiocboedēmbi nēbi ēbi ismec ma con mado chuibanu quequid con Pa nec. ²³ Ambi chiaid tantianu qeshun tantiaquiec papuedta —quepondash Esus.

²⁴ Aden chias Esus: —Chiaid bēda tantiatequidquio iquec qeshun tantiaquiec papuedquid icta. Aden chiaiduidi tantiec papuedquid abipadquid bēdambocquid ambia tantiaquidēn Nuquin Papan mibi icmendac. ²⁵ Adquid ambi tantiadoniaidquio iquendac. Aden tantienquioctšēcquidēn tantiaid bēda uesadendac nibēdquiec —quepondash.

Ambi siaboed icbon isenquiocnoc bacuēec quiaid

²⁶ Adec onquequin abēd icquidquio chuishumbic cho-choquidtsen naden Esusēn chuipondash: —Nuquin Papan shubu abentsēquēn tabadec caidaidquio chuibanu. Tantiata. Nidaid bēdan tiedēn caniquid pete ēshē siash ²⁷ tabadquin cainquidquio icbo nec. Dadpen ushquin ambi seboed isenquio yec icbo tabadnubi ²⁸ ambi seboed dēyucash caniec taitanec bacuēec. ²⁹ Ambi siaid isenquiocnoc canitanec bacuēacsho badedquio bedquid icbo nec. Adquiecbidi Nuquin Papan chiaid chuiban-chuibanubi papudedquid utsi-utsiec yanec chuibanquidēn isenquiocnobi. Papuedquioshon tantiabene. Adquid isash con shubun puduedquido

neque. Bednu quependac Nuquin Papa —quepondash Esus.

Mostasa caid ěshě chiaid
(*Mat 13.31-35; Duc 13.18-19*)

³⁰⁻³² Adec onquequin chuibanashic Esus: —Nadquio Nuquin Papan shubun icquido iqueque. Chuinu. Tantia. Mostasa caid pistsěc ěshěmpi ictsěcquid něsecaid děyu-cash nuamboshě caniec cuidi-cuidipambo iquec shubushubupambo yec podoc. Ambo uicchuněn shubu uaic. Adomboembidi aton shubun abi tantiaquid dadpen dayun uaquid Nuquin Papa nec —quepondash.

³³ Aden chuibanshumbic adomboembidi Esusěn chuibampondash. Aden chuibanash, aidtedquio tantiapec abibi qeshumbic aden chiaid chuiquin ěmpondash Esusěn. ³⁴ Aden abited chuibanshumbic aběd icquiduidtsěqui bědamboen tantiaquid chuipondash.

Acte těccoasquiaid ěněd cac ěnědaid
(*Mat 8.23-27; Duc 8.22-25*)

³⁵ Adashic abi ushěmbi inchěshbudtsěc cano antabědtoanec Esus: —Chian uquě cuěma utsiuc nuquiuidtsěqui nidnu. Nid —quiampondash aběd icquido caic. ³⁶ Aden chiac chian cuěman tabadcuededquido niananec badedquio nidquin canon Esus buampondash. Aběd icquidon potenubien cano antabědtoanquin utsin-utsinquin potepondash. ³⁷ Aden potenubien cunquequid dapan acte těccoasquequin cano acte uemiaiděn mentoadtsempondash Esus těotadec ushnumbi. ³⁸ Adec uec usho: —Cunquequid dapan acte těccoascaiděn nuqui mentoeque. Isucunta, icbo —quequin Esus timpondash.

³⁹ Aden tinac uětsědtoshon Esusěn: —Mibi comapenec cunqueque. ěněd —cac badedquio ěnědpondash. Adem-bidi: —Mibi comapenec těccoasqueque. ěněd —cac badedquio ěnědoapondash acte.

⁴⁰ Aden ënëdmetanec Esus: —¿Atotsi quiash ëbi tantienquo yec dacuëdcuedede? Ëbi tantiesa mibi nepec —quepondash abëd icquido caic. ⁴¹ Adec Esus cuëñubi badedquo cunquequid dapa ënëdposh. Adecbidi acte tēccoasquequid ënëdoaposh. ¿Mitsipadquidën napeba? Ënëd cacpadequi ënëdposh —quec abibi onquecuededequi uëdëquianquiondash abëd icquido.

5

*Mayan icsa dadpen dapuduedaid bëdamaiaid**(Mat 8.28-34; Duc 8.26-39)*

¹ Adshumbic acte tēccoasquec ënëdmebon nidquimbi cuëma utsiuc potiash nidaid Cadada cashumbic Quedasa caid yacno choapondash. ² Ambobi choash pudundosho mayan icsa dapuduedaidën Esus bëquedpondash. Cuënote dapa macuësh dapaten icquid yacnoësh choquin bëquedpondash. ³ Aidi unësaid chococate cuënote dapa shëcuë uaidën tabadquid icpac caondash. Aidi shocosh bucun mëdantebëdta taë taniaid icboedi nadatiambo yanshobi mëtanetiapimbo yampac caondash. ⁴ Abi mëtaniaid shocosh bucu seccduatanquin tēs-tëstenepac caondash. Adosho isac abi tanebocpadquid utsi nibëdpac caondash. ⁵ Aidi inchëshën capucuenequi mëyanacbimboec sidquecuenepac caondash. Adec capuequi cuënoten abibi dasiadcuenepac caondash. Adec siadcuenequi dastidquebudnepac caondash.

⁶ Aidi abi yacno Esus canon chosho isanec titinquianec choash: —¿Tsusio, ada cho? —quiashic: ⁷ —¿Mibëd icquidtabi nedi? Mimbi namiaidpenquo nebi. Abia Yampidën madombo mibi icquin naden ëbi chuita. Mibi chian anëdënquiacno nësecainquo iquembi. Abimbo chiembi quequin ëbi chuita —quepondash mayan icsa dapuduedaid Esus chiec. ⁸ Adec mayan icsa dapuduedaid

abi onqueshobien Esusën: —Dapuduen —cashic: ⁹ —
¿Tsutsi cuëmédquid mibi ne? —quepondash Esus.

Adoaquien: —Dadpenquioshë. Cuëte podotedi
dapuduedondaïd nebi —quepondash mayan icsa
dapuduedaïd abentsëc yacimboec onquec.

¹⁰ Adashic: —Mibi nadatiambocquid cadoque. Èbitedi
chian anëdënquiacno nidmenquiocnuequin ¿nëïd
nidaidën adabi tabadmetsia? —quepondash mayan
icsatedi.

¹¹ Adnubien macuësh potseshun chancho dadpenhun
pec tabadpondash. ¹² Aden pec tabadsho isashien: —¿Ada
mimbi ëbitedi chancho dapuduedmetsia? —quepondash
mayan icsa Esus caic.

¹³ Adoaquien: —Dada dapuduencuededash chancho
dapuduedcuededta —Esusën cac dapuduencuededash
acte dapa quiusudacnombo comapenec niquec pudun-
pudunec mentoadbudnepondash chancho nibëdqüiec.

¹⁴ Adsho isash chancho pemequin isquido chiec
nidanepondash. Adec nidquimbi shubu dadpen icquid
uano-uanoec tabadquido chuituidac aidotsen isec cho-
chopondash. ¹⁵ Esus yacno cho-choshon mayan icsa
dapuduedaïd bëdamiosh quequin chuituidac mayan icsa
dapuduedaïd icboed naden isbededpondash. Dashcute
dasiuidesa icboedi dasiuidash tsadsho abimbo iquec
quequin isbededpondash. Aidën tantienquiocboedi
tantiec tsadsho adembidi isbededoapondash. Adec
tsadsho comapenen isbededequi nadatiambocquin naïd
nepec quetsëcquiec tabadcuededpondash. ¹⁶ Adec
tabadsho isun mayan icsa dapuduedaïd bëdamequin
chancho dapuduedmesho isboedon cho-choquido
tantiamenuen chuibampondash. ¹⁷ Aden chuisho
tantiashun cho-choboedon: —Nëmbo tabadenquio yec

nidec nid. Miböd tabadtiapimbo iquebique —capondash comapenen Esus chushcaquin.

¹⁸ Adsho tantiash cano yacno nidequi cano Esus antabödtonobien mayan icsa dadpen dapuduemboed choash: —Miböd icte bunebi. ¿Adabi buane? — quepondash. ¹⁹ Adoaquien: —Padi. Min shubuno nidtan. Ambo nidshun mibi bédamequin mayan icsa dadpen dapuduemeboed Nuquin Papa tantiaquin chuiban. Nuquin Papan ëbi ad icsho unësquiocquin dapuduemiac quequin chuiban —quepondash Esus. ²⁰ Aden Esusën chiaquien nidpondash. Nidequi shubu dadpen icquid yacno-yacnomboec nidanec nidaid Decapodis caid yacno choshon Esusën naid chuiban-chuibampondash. Aden chuiban-chuibansho tantiaquidtedi, Adopenshenda Esusën bédamiash, quec abibi onquec tabadcuededpondash.

*Nua intac budaid bédameshun champi unësaid bédamiaid
(Mat 9.18-26; Duc 8.40-56)*

²¹ Adshumbic canon Esusböd icquidon padpiden abi chobocmibidi chian poteoapondash. Adec chosho isash matses dadpen chian cuëmano padpidec cho-choashun mananuc Esus pudundotsëcshobi badedquio tsucus-tsucustsëcquio yec datsidadpondash. ²² Adnubien Nuquin Papan chiaid chuibante shubun tabadquido isquid, Aido cuëmëdquid, chopondash. Adec choquimbi Esus istuidash mibi bédambocquid nec quequin ismenuec Esus tauebudshun: ²³ —Con champi unëseque. Aid mishquin bédamec cho —cac ²⁴ Aidobëdi Esus nidpondash.

Adec nidshobi matses dadpenshun tsibanampondash. Tsucus-tsucustsëcquio yec nidquin Esus tsibanampondash. ²⁵ Esus tsibanquidquio chido utsi icpondash.

Aid chido seta 12ted matamec intac budash bēdanen-
 quiocquid icpac caondash. ²⁶ Dauë meniaqui bēdanen-
 quio icpac caondash. Dauëchoquid utsi-utsien piucquid
 menequin dauë bedshun chequi bēdanenquio yec in-
 tac nuambo yampac caondash aton piucquid naimēd-
 nubi. ²⁷ Adec intac icnubi capuquin Esusēn nabanaid
 chuisho tantianec nidquimbi matses dadpeshun tsi-
 bananubi aidēntsen tsibanampondash. Aden matses dad-
 peshun tsibananubi ismenquiocquin cachoc choshon
 Esusēn dashcute mishpac caondash. ²⁸ Aden aton dash-
 cuteuidtsēqui mishec bēdampatsiash icmane qeshun
 mishtsequi bēdampac caondash. ²⁹ Intac bēdanenquioc-
 quid Esus mishec bēdampac caondash. Ēmbi tantiac-
 padquiequi bēdanobi quequin ambibi tantiapondash.

³⁰ Adec chido bēdanubien ěmbi nadatiambocquin
 naoc quequin tantiec amibidi bidiadquin isec Esus: —
 ¿Tsuntsimbini mishposh? —quepondash.

³¹ Aden chuisho tantiashun abēd icquidēnquio: —
 Tsucus-tsucustsēcquio matses dadpen iquec, ¿tsuntsim-
 bini mishosh, quecta ique? —capondash.

³² Adec abēd icquid cuēdnubi onquenquiocquin, ¿Mi-
 daquidēnquio mishoshibique? Isnu, abibi quequin mat-
 ses utsi-utsien bēispondash Esusēn. ³³ Aden bēisbanubi,
 ěmbi mishoc quenquio yec bēdamboed uēdēquec choe-
 qui mibi nadatiambocquin naquid nec quequin tantiequi
 Esusēn taēno uebudshun abi mishec bēdanaid chuibam-
 pondash. ³⁴ Adoquien Esusēn: —Champi, mimbi tan-
 tiacpadquiequi mibi bēdanoc. Dada icsambo icboedi
 nēbi dada bēdambo mibi iqueque. Bēdambo yec nid —
 capondash chido chuiquin.

³⁵ Aden nidmenubien Aidon shubun icquid cho-
 choshon: —Min champi unēsoshe. Tsusio chomenda
 —capondash Aido chuiquin.

³⁶ Adnubien Aido Nuquin Papan chiaid chuibante shubun tabadquido isquid caic: —Dacuëdenquiocquin ëbi tantiata —quepondash Esus.

³⁷ Aden Aido chuishun Esusën: —Cho-choenda —capondash abi tsibanuequido chuiquin. Aden chianec Petedobëdta Acobo Uan, Acobon utsimbo aitedi buanec Esus nidpondash. ³⁸ Adec nidequi Aidon shubuno choquin comapenec shubicuededsho tantiatuidpondash. ³⁹ Aden tantiequi puduedash Esus: —¿Atotsi quec comapenec shubicuedede? Champi unësenquio yec ushac bimboec uec nec —quepondash.

⁴⁰ Adshobien tantiesa icquin mamënshumbededpondash. Adoquien aitedi puduemiasch champin tita aton papa chedo abëd icquidbëd champi yacno Esus puduedpondash. ⁴¹ Ambo choshon mëdante mëdintanquin Esusën: —Talita, cumi —capondash. Aton onqueten, Champi, isucunash nidto, quequin adopondash. ⁴² Adoac badedquio isucunash nidtoash capupondash. Champi seta 12ted icquid niøndash. Aidi bëdansho isun abitedishun, Adopenshenda iquec quequin isbededpondash. ⁴³ Aden champi bëdameshun Esusën: —Ëmbi naboed utsi chienda. Abimbo caimbi. Abentsëcquiobi chienda —capondash. Aden chuitanequi: —Champi peme —quepondash Esus.

6

Abi icnëdacnoshon Esus chieshënquido

(Mat 13.53-58)

¹ Auëshquio puduanec nidequi abi icnëdacno Nasaded caid yacno Esus choapondash. Abëdi abëd icquido chopondash. ² Ambo tabadashic chonoadtemaid ushën Nuquin Papan chiaid chuibante shubun puduedshun Nuquin Papan chiaid chuibanquin tauapondash Esusën.

Aden chuibansho tantienquiocquid abentsęc: —
¿Mitsishun chuibansho tantiashun adomboen Esusën
chuibampec? —quepondash.

Adnubien utsi: —¿Mitsicquidën ismiac Esusën nadati-
ambocquin nabampec? —queoapondash.

³ Adnubien utsi: —Nëmbocquid, cuëte nacnenquid,
Osen mado nec —queoapondash.

Adnubien utsi: —Ani Madia nec. Aton utsibo nëidtedi
nëmbo tabadquid nec. Nëidic Acobo, utsibic Ose,
utsibic Udas, utsibic Simon. Nëmbobidi aton chibi
chedo tabadoaic —quetsęcquiec tabadec onquecuededec
chieshcuededpondash.

⁴ Aden chieshënaqui Esus nadpondash: —Utsi yacno
nidshun Nuquin Papan chiaid chuibansho tantiaquid
dadpen icnubi abi yacno chuibansho chieshënquid aton
matses iquendac. Aton shubun icquido adecbidi iquen-
dac —quepondash Nasaded yacnoquido chiec. ⁵ Aido
abi chieshënquid icsho isun nadatiambocquin naban-
tiapimbo icpondash. Èbi bédamepec quequin tanti-
aquidquio daëdpactsęc icsho mishquin bédamepondash.
⁶ ¿Atotsi quiash ëmbi chiaid tantiatiapimbo icpec? Adem-
bidi nadatiambocquin nasho istiapimbo icpec quepon-
dash Esus abibi onquec.

Abëd icquido Esusën nidmiaid

(Mat 10.5-42; Duc 9.1-6)

Adashic auëshquiobi puduanec nidaniash shubu daëd-
pactsęc yacno puduedcuenequin Nuquin Papan chiaid Es-
usën chuibenepondash. ⁷ Adec cuenadquin chuibanequi
abëd icquido caic: —Cho —quetanec tabadtuidpon-
dash. Adec tabadtuidash Esus: —Nëbi mibi daëdshun-
daëdshunquien chuibanec nid. Chuibanquimbi mayan
icsa dapuduedaid dapuduemeta. ⁸ Nidquin dadpen
mitsana sauedshun buanenda. ⁹ Tapucudte sandadia

caiduidtsëqui tapucudash nidaneta. Adecbidi utsi be-
denquo yec mibi dasiuidaiduidtsëqui dasiuiddec nidaneta.
¹⁰ Shubu dadpen yacno nidash mibi yuedaid shubun
puduedash ambouidi tabadquin chuibanta. Auëshquoio
puduanec nidequi shubu dadpen yacnobidi nidshun
adquiecbidi tabadquin chuibanoata. Adenuidi naquin
chuibanta. ¹¹ Mibi yuedquid nibëdsho isash nidaneta.
Auëshquoio nidash shubu ënëdacno choash, Nëmbo ic-
quido tantiate icsachoquid yec abibi cuidadtequido nec,
Papa. Adquid icscho isun abi capuaid nidaid pututedi
tasequequin Nuquin Papan chiacpadomboen ismeta —
capondash Esusën abëd icquido chuiquin.

¹² Aden Esusën chiaquien nidanepondash. Adec nid-
shumbic, mibi icsaid ënshun padpiden tantianu quen-
quiocquin Nuquin Papan chiacpadomboen nabanta que-
quin chuibampondash Esusën nidmiaidon. ¹³ Adembidi
mayan icsa dapuduedaid dadpen dapuduemepondash
aidëmbidi. Adembidi nënquid dadpen daicsaid chedo
cuëte bacuë bëchichoquid ënë dachinquin bëdameoapon-
dash Esusën nidmiaidon.

Uan acten mentoanquid mapi butiaid

(Mat 14.1-12; Duc 9.7-9)

¹⁴ Adnubien, Chuibanquimbi Esusën nadatiambocquin
nabanosh, quequin isboedon ancanquid Edodes chuipon-
dash. Aden chuiban-chuibanac dadpenshun Esusën na-
banaid tantiapondash. Aden tantiash: —Uan acten
mentonandaaid mapi butemeboed uincuempash icnui.
Adec uincuenshun nadatiambocquin nabanec nepanui —
quecuededpondash tantiaquido.

¹⁵ Adnubien utsibo: —Ediasien nechitec. Nuquin Papan
chiampicpadquiec choashien nec —quecuededpondash.

Adnubien utsibo: —Nuquin Papan chiaid chuipampi-
dien Esus yanchitash —quecuededpondash.

¹⁶ Adnubien Edodes: —Ĕmbi mapi butemiondaid, Uan pado, uincuempash icnui —quepac caondash.

¹⁷ Ĕnden aidĕmbi Uan bedmeshun tanemeshun quĕnĕn nauedmepac caondash. Aidĕmbi aton utsin chido, Edodias caid, bedacsho isash: ¹⁸ —Min utsin chido mimbi bedaid natemaid niosh —queshun Nuquin Papan Moises dada uamepampicpaden Uanĕn Edodes chuipac caondash. Adoac, Uanĕn chuisho dadpenshun tantianushe quesahun Uan bedmeshun quĕnĕn nauedmepac caondash Edodesĕn. ¹⁹ Adoaquien Uan Edodiasĕn chieshĕnquin: —Uan cuesunemetiadquidi mibi nec —quepac caondash aton bĕnĕ Edodes caic. ²⁰ Uan bĕdamboquid Nuquin Papan chomiaidbidi nec quesahun Edodesĕn Uan cuesunemetiapimbo iquec cudaspac caondash con chidon cuesunemenushe quiash. Aden tantiaquin Edodesĕn abi tsadacno Uan chuibamenuen chomedenepac caondash. Uanĕn chuibansho tantiash: ¿Atotsimbi nĕid napeba? Ambi chuibanaid bĕdambo iquec. Aidĕn chuisho tantiash bĕdambo iquebi, abibi quesumbic Edodesĕn chomedednepac caondash chuisho tantianuen.

²¹ Adnubien aton chido bunacpadomboen Uan cuesunemete ushĕ chonobi naden napac caondash: Aton bĕnĕn abi tishte ushĕ tantiaquin abipadquid dadpen pemenuen chomepac caondash. Adembidi sondado tsusio dadpembidi chomeoapac caondash Edodesĕn. Cadidia yacnocquido chuiquid dapabobidi chomeoapac caondash.

²² Aden aidtedi cho-chomias tabadnubien aton chidon champi puduedpac caondash. Puduedacsho: —Baidata —cac baidapac caondash. Adsho isash: —Bĕdamboen mimbi naoc —quecuedepac caondash Edodesĕn chomaido champi caic.

Adec onquesho tantiashien Edodes aton chidon champi caic: —Mibi bunaid mibi menenu. Ĕbi chui. ²³ Abimbo

caimbi. Mibi bunaid ëbi chuita. Mitsanatedi bunebi ëbi casho tantiashun dadpen mibi menembi —quepondash.

²⁴ Aden Edodesën chuisho tantiash: —¿Atotsibi bumpeba? —quetanec aton tita yacno puduedshun: —“Mibi bunaid mibi menenu. Ëbi chui,” Edodesën caoshi. ¿Atotsimbi chuipe, tita? —quepac caondash ani chiec.

Adsho tantiashun anin: —Uanën mapi bunebi quequin chuita —capac caondash aton champi chuiquin.

²⁵ Aden chiaquien badedquio Edodes yacno titinquec choec puduedshun champin: —Nëbimbobi Uan acten mentoanquidën mapi maspanën nandoshon ëbi mene —capac caondash anin chuibocpadomboen chuituidquin.

²⁶ Adsho tantiash Uan tantiec unësquio icpac caondash Edodes. Adec unësquiocquin ambi champi chiacpadomboen natiapimbo iquec ëmbi chomiaido quenushe qeshun adoembi abibi qeshun: ²⁷ —Uanën mapi bec cho —capac caondash Edodesën ambi cuesuneta caid chuiquin. Aden chiac Uan quënën nauedacno nidshun mapi butanquin ²⁸ maspanën nandoshon bëshun champi meniac bedshun champin aton tita menetuidpac caondash. ²⁹ Adnubien, Uan mapi butiac, qesho tantiash Uambëd icquido nidshun Uanën dada bedshun buanshun chococapac caondash.

Dada 5000ted Esusën pemiaid

(Mat 14.13-21; Duc 9.10-17; Uan 6.1-14)

³⁰ Adambic Esusbëd icquido ambi nidmeboedo Esus yacno cho-choshon ambi nabamboedbëdtabi ambi chuibamboed chuibampondash. ³¹ Aden chuibanash tabadnubi matses dadpen cho-chonobi utsi dadpen nidanepondash. Adec cho-chonobi penquio iccuededpondash Esusbëd icquidon. Adnubien Esus: —Matses nibëdacno tabadec nidnu. Nid —quepondash abëd icquido caic.

³² Aden chiashic cano antabëdtoanec matses nibëdacno nidpondash aidtedtsëqui. ³³ Adec nidsho isash matses dadpen abi nidte yacno tantiec: —U nidanec —quiash titinque choec abia cho-chopondash. Abia titinquequid cuensho isash utsi-utsiec dadpen titinquec cho-chopondash. ³⁴ Adec aidtedi abia cho-choambien Esusbëd icquido choapondash. Pudundoquimbi matses dadpenshun abi cainec tabadsho isashien Esus, Abi tantiamequin Nuquin Papan chiaid chuiquid nibëdabimboecnuc matses cho-choec quequin tantiec unësquio iquebi qeshun tauain chuibampondash Esusën. Yuen chuibampondash.

³⁵ Yuen Esusën chuibanubi ushë budpondash. Ushë budsho isun abëd icquidon: —Icbo, ushë budaque. Nëmbo tiedën caniquid nibëdec; adecbidi yuedanquid nibëdec. Matses nidme. ³⁶ Nidmiac shubu yacno nidshun piucquid menequin ma aton pete bedpanuna penun —capondash Esus chuiquin.

³⁷ Adoaquien Esusën: —Mimbibi nëidtedi pemeban —capondash.

Adsho tantiashien: —¿Adambi nidshun piucquid menequin panëmpi bedpe? Ma matses dadpenquio yoc —quepondash abëd icquido Esus caic.

³⁸ Adoaquien: —¿Panëmpi penun bëaid iccuededquidon na tedtsi iqueque? Ista —capondash Esusën.

Aden chiac ashunquiobi matsesën bëaid isbanash abëd icquido: —Panëmpi sincoted icnubi nuëcquid doted iquec —quepondash.

³⁹ Aden bësho isun: —Uasinën tabadbud mibëd icquid 50ted icnuc, utsibëd icquid 100ted icnuc quec tabadbud —capondash Esusën iccuededquido chuiquin. ⁴⁰ Adoac

ambi chiacted-tedquiec tabadbudpondash. ⁴¹ Adec tabadbudsho isun panëmpibëdta nuëcquid bedshun sananquin abuc isec: —Mimbi meniaid nec Papa. Nëbi mimbi nadatiambocquin naid ismembi —qeshun cuësh-cuëshun: —Meneban —Esusën cac abëd icquidon menebampondash. ⁴² Menebanac piash: —Padi. Piombi —quecuededpondash pequido. ⁴³ Aden piambien abëd icquidon napi uaid bedbampondash. Napi uaid sandobanaid tsitsan 12ted icpondash. ⁴⁴ Peboedo dada caniaid tambanac 5000ted icpondash. Aton chidon aton bacuëbobëdtambi pepondash. Aido tambanenquiocquin dadatedictsëqui tambampondash 5000ted iquec quequin.

Acte bëntse Esus choaid

(Mat 14.22-27, 34-36; Uan 6.16-21)

⁴⁵ Aden iccuededquido pemiashic: —Cano antabëdtoanec mibia shubu dadpen icquid Betsaida caid yacno potec nid. Mibi nidnubi matsstedi nidmembi —quepondash Esus abëd icquido caic. ⁴⁶ Adoac canon potenubi matsstedi nidmianec matses nibëdacno macuësh yacno Nuquin Papa chuinuec Esus nidpondash. ⁴⁷ Adnubien inchëshbudtsëqui abëd icquido acte nënantanquio canon noadpondash. Ambobi noadnubi Esus abentsëqui mananuc tsadpondash. ⁴⁸ Ashunquio Esusën isaquien abëd icquido bëdiactsëcquio nidquimbi comapenen cano uncapondash cunquequid dapan bëded-bëdednubi. Adnubien cachina cuëdanabi badiadtiapimboconoc acte bëntse choquin abëd icquido Esusën ismetuidpondash. ⁴⁹ Datantsensho isash, Mayambien nechitec, quequin ambibi tantiec sidquecuededec ⁵⁰ dacuëdcuededpondash.

Adsho isumbien: —Ëbibi nebique. Dacuëdenquio yec tabadta —capondash Esusën. ⁵¹ Aden chuitanec cano antsadtonobi comapenec cunqueboedi ënëdpondash. Aid

ënédsho isash: —Adquidshenda nepec —quepondash abéd icquido. ⁵² Panëmpi daëdpactsëc ictsëcquid mat-ses dadpen menebamboedën naid nec quequin tantienquiocondash. Adembidi Esus acte bëntse capusho isun, Nadatiambocquin naquidën naidbidi nec, quequin tantienquio icoapondash pamunacbimboecquin.

⁵³ Ashunquio chian potiashic nidaid Quenesaded caid yacno choshon cano nëshpondash. ⁵⁴ Aden nëshash man-
anuc pudundosho isec anocquido, Aidi bédamianquid nec, quequin ambibi tantiaquimbi ⁵⁵ daicsaid aton ueten nandoshon Esus yacno bë-bëpondash. ⁵⁶ Adecbidi shubu dadpen yacno-yacnomboec Esus puduedcuenesho isun adembidi anocquidon, Bédamequid nec, qeshun daicsaido bë-bëpondash. Adoac —Min dashcute ëbi mishme —capondash bë-bëaidon. Aden ambi tantiacpaden Esusën dashcute mishash bédancuededpondash.

7

Nuquin Papan paucaid
(Mat 15.1-20)

¹ Adashien Edusaden caid yacnoësh padiseyobobëdi isadaidbo tsusedpabon chiaid tantiaquin chuiquido Esus yacno choshon, ² Èmbi mishboed mishtemaid ictsias, quesa iquec tsusedpabon chuinëdacpadquiec mëpanudabi Esusbëd icquidon pesho ispondash. ³ Padiseyobo isadaidbobidi yec tsusedpabon chuinëdacpadquiec penush mëpanudanequid nec. ⁴ Tiedën caniquid ambi piucquid menequin bedacnoësh choec adecbidi penush tsusedpabon chuinëdacpadquiec mëpanudanequido isadaidbo nec. Isadaidbo tsusedpabon naden nata quequin ambibi chuinëdaid utsi-utsiec dadpen iquec. Ambi chuinëdacpadomboen dëshotetsen cachonouidi dapanquidquibidi nec. Adembidi matsu

nacnenaid cachonouidi dapanoaquidquiobidi nec. Shocosh matsu cachonouidi dapanoaquidquiobidi neoaic. Tsusedpabon chuinëdacpadomboen naquidquo nec.

⁵ Aden nabanquidquo padiseyobo nec. Adquiobidi abipadquid utsibo isadaidbo tsusedpabon naden nata quequin chuinëdaid tantiaquid neoaic. Adec tsusedpabon chuinëdacpadquiec Esusbêd icquido mëpanudenquiocsho isash padiseyobo: —Atotsieshun mibêd icquidon tsusedpabon chuinëdacpadomboen nainquiocquin mëpanudabi pepec —quepondash Esus caic.

⁶ Adoquien Esus: —Isayasën êndenquio dada uaquin mibitedi bédamboen chiampidpadquid mibi nec. Ambi dada uampid nad iqueque. Tantia:

“Nuquin Papa bédambocquid nec quequin chiacpadomboen tantiesa isadaidbo nec.

⁷ Abia Yampidênquio Nuquin Papan nadomboen nata quequin chiaid tantiesa icquin tsusedpabon nadomboen nata quequin chuinëdaid tantiaquidquo nec.”

⁸ Aden tsusedpabon chuinëdacpadomboen nabanquin Abia Yampidênquio chiaid niacquid mibi nec — quepondash Esus isadaidbo tsusiobo caic Nuquin Papan Isayas dada uamepampid tantiamenuc.

⁹ Aden chuishumbic adomboembidi chuioaic: — Badedquio Nuquin Papan chiaid chieshênquin tsusedpabon nadomboen nata quequin chuinëdacpadomboen nabanquidquo mibi nec. ¿Aden naquinda Nuquin Papan chiacpadomboen mimbi nape? ¹⁰ Nuquin Papan chiacpadomboen Moisesën dada uampid nad iquec: “Titan papabêdtan chiaid chieshenquiocquin naban.” Adquidên chiaid utsi nad iqueque. Tantia: “Aton papa icsamboen chuiquid unës ua. Adembidi aton tita icsamboen chuiquid unës uaoa,” quequin Nuquin

Papan chiac Moisesën dada uampid nec. ¹¹ Mibien tsusedpabon chuinëdaid tantiaquin adoesa nec. Papan na naimëdacsho isun naden mimbi chiec. Mibi nashunquin menetiapimbo iquebi, papa. Mibi menenquiocquin Nuquin Papa Abia Yampid nashunquin menenun ëmbi dayun uaid nec, papa, quequin mimbi chiec. Adembidi titatsen mimbi chuoiaic. Aden chuiquin papabëdta tita tantiaquin nashunenquiocquin Nuquin Papan chiaid niacquid mibi nec. ¹² Aden mimbi nashunenquiocquin ismiacpadec, Papa, mibi nashunquin menetiapimbo iquebi, queoaic utsibo. Adecbidi, Tita, mibi nashunquin menetiapimbo iquebi, queoaic. ¹³ Aden chuiquimbi titabëdta papa tantiaquin nashunta quequin Nuquin Papan chiacpadomboen nainquiocquin tsusedpabon chuinëdacpadomboenuidi nata quequin chuiquidien mibi nechitec. Adembidi Nuquin Papan chiaid utsi-utsien naisa mibipadquid utsibo icmequin tsusedpabon chuinëdaid nata quequin mimbi chiec —quepondash Esus isadaidbo tsusiobo caic.

¹⁴ Aden Nuquin Papan chiacpadomboen niacquido chiashic: —Utsibo, tantiec cho. Mibi bëdamboen chuinu. Bëdamboec papuedta. ¹⁵ Tsusedpabon chuinëdacpadquiec mëpanudabi mimbi piaid min tantiate icsabudtemaid nendac. Icsamboen tantiec mibi icsaic. ¹⁶ Ëmbi chiaid tantiaquin utsi chuibanta —quepondash Esus.

¹⁷ Aden chiasch iccuededquido abi tabadnubi shubun puduedash tabadpondash Esus. Tabadsho isash: —Mimbi chuiboed ëbitedi tantieme —quepondash abëd icquido. ¹⁸ Adoquien: —Utsitedishun tantienquio icbocpadquido mibitedi neque. Tantia. Mimbi piaidën mimbi tantiaid icsabudtiapimbo iquec. ¹⁹ ¿Min tantiate yacnoda mimbi piaid nidpec? Padenquio. Mimbi piaid min pucu yacno

bud-budec auëshquio chimu nëncuenash puduenec — quepondash abëd icquido caic.

²⁰ Aden chiec onquiashic: —Mimbi tantiacpadquiequi mibi icsabudec. ²¹ Chido mimbi inacmaid isash chudtiadquio iquec quequin mimbi tantiacpadomboen chido isuidtiapimbocquin mimbi chudted-chudtedec. Utsin na bedtiadquio iquebi quequin mimbi tantiacpadomboen mimbi ampec. Cuesunetiadquio iquebi quequin mimbi tantiacpadomboen mimbi cuesunepec. Utsin chido chudtiadquio iquec quequin mimbi tantiacpadomboen aidi mimbi chudpec. Dada utsin ëbi bëdaidquiocsho ispec quequin mimbi tantiacpadomboen min bënëpenquio chudmequid mibi nec. ²² Utsin bedactedi bednu quequin mimbi tantiacpadomboen bedquid mibi nendac. Adecbidi utsin bedaid isash adomboembidi bednu qeshun isuidesa iquec adomboen bedbanquidquio mibi yampec. Mibibi icsambocquid nec quiash chieshëmëquid mibi nendac. Adquid abimbo chiacbimboen chuiquid mibi nendac. Icsauidi bunquin adenuidi nabanec. Mibi icsaquin ompoenquiocquin nabanquid mibi yanec. Utsi bëdambo icsho isash chieshënquid mibi icpec. Utsi icsamboen chuiquid mibi nendac. Utsin chuisho, Ëbentsëqui tantiaquidquio nebi, quequin mamënshunquid mibi nendac. Adembidi nasho mamënshunoaquidbidi mibi nendac. Ëmbia tantiaquid nebi, quequin mimbibi nabanaid icsa isash bëdambo iquec quec mibi mamë nec tsadec. ²³ Ëmbi chuiboedtedi icsaquidën naid nec. Aden tantiaquid icsabudte nec —quepondash Esus.

Sidopenisia caid yacnoësh chido ambi tantiacpadquieci bëdanaid

(Mat 15.21-28)

²⁴ Aden chiashic isadaidbo yacnoësh puduanec nid-equi isadaidpembo yacno nidpondash. Shubu dad-

pen icquid Tido caid anoentsëqui yacno choash shubun puduedash: —Nëmbo ëbi choaid chienda —quepondash Esus. Ambi chiacpadpenquiocnoc chuisho tantiapondash anocquidon. ²⁵ Adoac: —Esus chosh —quesho tantiashien mayan icsa dapuduedaidën tita Esus tabadacno nidpondash. Adec nidec puduedequi Esus tauebudpondash chuiquid dapa nec quequin tantiec. ²⁶ Isadaidpembon chido nidaid Sidopenisia caid yacnocquid niondash. Aidi Esus tauebudash: —Con champi mayan icsa dapuduedaid dapudueme, tsusio, —quepondash comapenen chiec.

²⁷ Adoaquien Esus: —Mabi con matses isadaidboba bëdamenuc choboc. ¿Bacuëbo cubudabicnubi opashëmpida pete menequin anin bënëpadic? Padenquio. Adembidi, ¿isadaidbotedi bëdamiabidambi matses utsibo, isadaidpembo, bëdamepadi? — quepondash Esus.

²⁸ Adsho tantiashien chido: —Icbo, mimbi bëdamboen chiec. Padnuen anin meniac bacuëbon pete sananaid cuëshëmpi paëdtsacsho opashëmpin ambibi bedshun pec. Adembidi mimbi nadatiambocquin nabanac isadaidbo dadpen bëdanubi isadaidpembo abentsëc tantiaquid yec bëdanoapec —quepondash chido.

²⁹ Aden chidon chuishobien: —Bëdamboen mimbi chiec. Aden tantiaquid mibi neque. Nidec nid shubuno. Mayan icsa dapuduedaid dapuduenaque. Isec nid — capondash Esusën isadaidpembon chido chuiquin.

³⁰ Adsho tantianec choec shubun puduedquin isaquien aton champi uebocno ënden mayan icsa niqúan bëdanash abi ushaidëmbi uec.

Pashu buëd onquenquiocquid Esusën bëdamiaid

³¹ Adashien Tido caid anoentsëcuësh nidequi Sidon caid matambidanec chian Cadidia caid yacno choapondash Esus. Nidaid Decapodis caid shubu dadpen yacno-yacnomboec capucueniash choapondash. ³² Ambo choash tsadnubien dada icsa, pashu buëd onquenquiocquid, Esus yacno bëash tsadquin: —Nëid mishquin bëdame —capondash.

³³ Adsho tantiashun iccuededquido ismenquiocnuen udictsëc dada icsa buanshun aton mëdante bushbi pashun pabiate pausuntanquin chicpondash Esusën. Adshun, min anatsen mishnu quetanquin ismequin uicchun mëpidadtanquin pashun ana mishpondash. ³⁴ Aden amishec abuc isec: —Epata —quepondash. Paucud, quec adpondash Esus. ³⁵ Adec Esus cuëdnubi pashu buëd onquenquiocboedi tantiadcuenash onquiampondash.

³⁶ Aden pashuaid bëdamiash: —Esusën naid nec quequin chienda —quepondash Esus. Adoboqui niacbidanquin chuibampondash. ³⁷ Aden chuisho tantiash: —Adquidshenda Esus nepec. Ambi naidtedi bëdambo iquec. Pashu paucquid nec. Adembidi ana onquesa oncamequid nec —quec onquecuededpondash.

8

4000ted matses Esusën pemiaid (Mat 15.32-39)

¹ Adashic Esus yacno matses dadpen padpidec chochoash yuec tabadec bundocuededpondash. Adsho isun abëd icquido chomiash Esus nadpondash: ² —Matses bunec tabadsho isash unësquio iquebi. Daëdec ushec ëbëd tabadquin aton pete uesquin piac. ³ Aton pete nibëdsho isash, Pec nid, quetiapimbo iquebi padishnushe quiash. Ënapenuësh dadpen cho-choash nec —quepondash Esus abëd icquido chiec.

⁴ Adoaquien: —Pete nibëdacno nuqui tabadec. Pemenun ¿Mitsimbo nidshumbimbi pete bedpatsia? — quepondash abëd icquido.

⁵ Adsho tantiashien: —¿Tedtsi panëmpi mitsana iquec? —quepondash Esus.

Adoaquien: —Siete iquec —quepondash abëd icquido.

⁶ Adnubien: —Tabadbud —quetanquin Esusën panëmpi sieteted bedshun sananquin Nuquin Papa ambi pete icmiaid chuishun panëmpi cuësh-cuëshun: —Nëid meneban —cac abëd icquidon iccuededquido menebampondash. ⁷ Adembidi nuëcquid dëmishaid daëdpactsëcbidi bedshun: —Mimbi meniaid nec quequin tantiemi, Papa —qeshun: —Nëidtsen meneban — Esusën cac menebanoapondash. ⁸ Aden menebanac piash: —Padi. Piombi —quecuededpondash. Aden piambien napi uaid tsitsanën sandoquin abëd icquidon bedaid tsitsan sieteted icpondash. ⁹ Peboedo dada caniaid dadpen 4000ted icpondash. Chidon aton bacuëbobëdtambi pepondash. ¹⁰ Aden pemeshun peboedotedi nidmiash Esus abëd icquidobëd cano antabëdtoanec nidquin Dadmanuta caid yacno potepondash.

Nadatiambocquin nata. Isnu, padiseyobo quiaid

(Mat 16.1-4; Duc 12.54-56)

¹¹ Aden potiash tabadnubien cho-choshon padiseyobon: —¿Nuquin Papan chomiaid nebi quepecta mibi icco? Aidën chomiaid icquin nadatiambocquin nata. Isnu —capondash Esus chuiquin.

¹² Adsho tantiash, Èbi tantiesa nec, quec unësquio yec tsadequi —Èmbi naid dadpen mimbi ispaboc. ¿Adosho isboshida, Èbi isme, queoape? Nadatiambocquin nabanquin èbi isme caqui ismenquio iquembi. Abimbo

caimbi —quepondash Esus. ¹³ Aden chianec nidec cano antabédtoanquin uquë cuëma utsiuc poteopondash.

Nuquin Papan chiaidbédta ambi chiaid daéd uaquin chuiquid padiseyobo

(Mat 16.5-12)

¹⁴ Badedquio Esus nidnuesho tantias cano antabédtopondash abéd icquido. Panëmpi bedabi puduampondash panëmpi abentsëqui tsitsanën anuetsëcnu. ¹⁵ Aden potequimbi Esusën nadopondash: —Pan uanuequidën trico caid putubédta bidiscamete acte pistsëc cacushaqui nua yec bidisquëc. Adembidi padiseyobon Nuquin Papan chiaidbédtabi ambibi tantiaquin chiaid daéd uaquin chuibanec. Aden chuiquidbidi Edodesbéd icquido nec quequin tantiaata. Aden tantiaquin padiseyobopadquid adecbidi Edodesbopadquid icmane qeshun ambi tantiacpadomboen nabanenda —capondash Esusën abéd icquido chuiquin.

¹⁶ Adsho Esusën chuiboed icsamboen tantiec abéd icquido: —¿Ëmbi panëmpi bëambo yaidta icbon chuipec? —quëc onquëcuededpondash.

¹⁷ Aden chieç onquëcuedednubien tantiaquidquio icquin Esusën nadopondash: —¿Atotsi quiash ¿ada panëmpi bëambo yaid con Icbon chuipec? quepe, mibi? ¿Ëmbi nabamboed isenquio yec bëshu tsadacbimboecta tsadpo? ¹⁸ Adecbidi ¿Ëmbi chuibanaid tantienquio yec pashuacbimboecta tsadoapo? ¹⁹ ¿Panëmpi 5ted bedshun cuësh-cuëshun menebanaqui napi uaid tsitsanën sandoaid tedtsi iccoshe? Chui —capondash Esusën.

Adoaquien: —Dosedet iccosh —quepondash abéd icquido.

²⁰ Adoaquien: —Adembidi, ĵnëbi siete panëmpi bedshun matsesën piaid napi uaid tedtsi tsitsanën sandoaid icposh? Chui —caoapondash Esusën.

Adoaquien: —Siete iccosh —quepondash abëd icquido.

²¹ Adoaquien Esus: —ĵNadatiambocquid Esus nec quequin ëbi tantienquioda mimbi icpe? —quepondash abëd icquido caic.

Betsaida caid yacnoshon bëshu bëdamiaid

²² Adshumbic Betsaida caid yacno poteoapondash Esusbëdtambidi. Aden potiaş chosho isun bëshuaid bëpondash anocquidon. Aden bëshun ismequin: —Nëid bëshumbo neque. Mibi bëdamaianquidquio icquin mishquin bëdame —capondash Esus chuiquin. ²³ Adsho Esusën bëshu mëdianquin Betsaida caid anoentsëqui buanshun uicchun bëcuishtuatanquin bëmishec: —ĵAda mimbi isequè? Èbi chui —capondash Esusën.

²⁴ Adsho tantiash Esus isquin: —Bëdamboen isenquiocquin cuète podo inchëshquio yacbimboecnuc mibi isembi —capondash bëshuaidën. ²⁵ Aden chuishobi Esusën bëshuaid padpiden bëmishoaquien bëucudquiopondash bëdamboen isec. ²⁶ Aden bëdamboen iso isun: —Nëbi min shubuno nid. Shubu dadpen icquid Betsaida caid datambidanec nid —quequin Esusën nidmepondash.

Quidistu mibimbo neyoc, Petedo quiaid

(Mat 16.13-20; Duc 9.18-21)

²⁷ Aden nidmiashic ancanquid Uedipo caid tabadaid nidaid Sesadeya caid yacno nidequi: —ĵAtotsi Matsesën ëbi capec? —quepondash Esus abëd icquido chiec.

²⁸ Adoaquien: —Utsi-utsiec, Acten mentoamboed, Uan Esus nec, quenubic; utsi-utsiec, Edias, Nuquin Papan chiacpadomboen chomiaidien Esus nechitec, quenubic;

utsi-utsiec, Nuquin Papan chiaid ëndenquimbo chiampid-padquidien Esus nechitec, quec —quepondash abëd icquido Esus caic.

²⁹ Adsho tantiashun: —Ma mibitedishun ¿atotsibi cai? —capondash Esusën.

Adoaquien: —Quidistu, Nuquin Papan ambi tantiampicpaden abi yacnoshon chomiaidquio mibi neyoc —quepondash Petedo abëd icquid utsibo onquiacbimboen chuoiaic.

³⁰ Adsho: —Mimbi chuiboed utsi chienda. Abentsëc-quiobi chienda —capondash Esusën abëd icquido comapenen chuiquin.

*Abi unës uate Esusën chiaid
(Mat 16.21-28; Duc 9.22-27)*

³¹ Aden chuishun abi unës uate tantiamequin abëd icquido Esusën chuipondash. Nuquin Papan chomiaid yec matsesacsho isadaidbo tsusiobon chieshënquin ëbi mëyanendac. Aden mëyanquin unës uaqi daëdec ushash uincuenoaindabi, quequin Esusën chuipondash. ³² Abi unës uatequid chuipecshenda niondash. Aden Esusën chiaquien aidbëdtsëqui uano nidshun Petedon: —Aden tantiaquin chienda —capac caondash.

³³ Aden Petedon chuisho tantiash aucbidi bidiadquin abëd icquid utsibo isec Esus nadpondash: —Nidec nid, Satanas. Nuquin Papan tantiacpadpenquiocnoc ëbi niacmenuequin icsamboen chuiquid mibi neque. Satanasën mua uac matsesën tantiacpaden mimbi tantiec —quepondash Esus Petedo comapenen chushcaic. Petedo Satanasbimboecquid nec quequin Satanas capondash Esusën Petedo chuiquin.

³⁴ Aden Petedo chuibanashic abëd icnuec cho-choquid utsibo caic: —Cho —quepondash Esus. Chosho isash: —Esuspadquid icnu qeshun mibi bunaid nainquiocquin

ëmbi chiaid tantiaquin nabanta. Ëbi mëyanacpadem-bidi mibi mëyante icnuc niaquenda. ³⁵ Esus tantiaquin ambi chiacpadomboen nanu queboedi unësmance quequin naisa Nuquin Papa yacno puduedtiapimbo iquendac. Esus tantiaquid nebi quequin tantiec mëyante icnuc unësmance quenquiocquin ëbi chuibanec tabadquid Nuquin Papa yacno tabadendac. ³⁶ Aden aton na dadpen bedbanashic Esus tantiesha yec unësash Nuquin Papa yacno puduedtiapimbo iquendac. ¿Adquidta bédambo icpadic? ³⁷ ¿Nuquin Papa mitsana menecta abi yacno puduedpatsia? Padenquio. ³⁸ Utsi icnubi dacuëdec Esus tantiaquid nebi quesa chido aton bënë bunenquio yec dada utsibéd tabadquidbimboecquid nec. Adquid chuiquin, Con utsi nec, caisa nendabi. Adembidi ëmbi chiaid chiesha caic, Con utsi nec, quequin Nuquin Papa chienquio iquendambi. Chuiquid dapa abipadquidquio con pan ëbi icmiac ëmbi abucshun uaido mayan bédabobëdi nidaidën choaindabi. Adec aidobëdi choashun ëbi chieshënquid isec, Con utsi nec, queoatiapimbo iquendabi —quepondash Esus chochoquido caic.

9

¹ Aden chiashic Esus: —Nëbimbobi tabadquid ëbi tantiaquid utsi-utsiec unësabicquin nidaidën tabadquin Nuquin Papan nadatiambocquin nabanaqui Nuquin Papan shubun icquid abi tantiaquid utsi dadpen yansho isendac —quepondash.

Esus bédaidquio icmiac
(*Mat 17.1-13; Duc 9.28-36*)

² Aden chuibanashic 5ted ushash: —Nidnu. Nid —quianec Esusbéd Petedo, Acobo, Uan, aitedi ambi chictedi macuësh dapa yacno nidpondash. Ambo nidash

tabadquimbi abi bēdambo isadaid aidon ispac caondash. ³ Abi dasiuidaid dashcute icboedi nac-nacquio yampac caondash. ⁴ Edias, Moises, aid daēd ěnden yampidi Esusbēd onquesho ispac caondash Esusbēd choבוד. ⁵ Aden isequi: —Chuiquid Dapa, nuquibi nēmbo choash tabadquin mibi isec bēdambo iquebi. Min shubumpi 3ted icnuc shubu uanuna mitsana, Moisesēn na, Ediasēn na, aited icnuc —quepac caondash Petedo. ⁶ ¿Atotsimbi chuipe? quetiapimbo yec dacuēdcuededquin aden chuipac caondash Petedon.

⁷ Adec tabadshobien abu ushu choquidēn ambo tabadquidtedi bētimpac caondash. Aden bētinacnoēshquiobi Esus chiec onquiampac caondash: —Esus, con madombo con dayunquiocquid nec. Adquid icquin chuibancho bēdamboen tantiata —capac caondash Nuquin Papan.

⁸ Adsho isbanquin isaquien Esusbēd choבודuidi icopac caondash.

⁹ Adanec macuēsh yacnoēsh budtanequi: —Mimbi isboed nēbi chienda. Ĕbi Nuquin Papan mado matsesacsho unēsmiac ěbi uincuenan mimbi isboed chuita —capac caondash Esusēn. ¹⁰ Adsho tantiash utsi chienquio yec abi uincuemetē ¿mitsipadquio icpec? quec abibi onquecuededpac caondash Esusbēd choבוד.

¹¹ Adec onquecuededash: —Nuquin Papan chomaidquio choabicnuc Ediasba choendac quequin tsusedpabon nadomboen nata quequin chiaid tantiaquidon chuibanec. Ma Edias ěndenquimboshē chopampic —quepondash abēd icquido Esus caic.

¹² Adoaquien: —Ai, Ediasēn matses bēdamboen tabadmenuen chiampidpadquidba choendac quequin Nuquin Papan chiaid nendac. Adembidi Nuquin Papan chomaidquio yec matsesash nēbi tabadsho matsesēn chieshēn-

quin mëyanendac quequin chuipampid nec. ¹³ Ediasën chiampicpadquiec Uan acten mentoanquid chopondash. Aidi choacsho abi bunacpadomboen abi chieshënquidën mëyanac. Èndenquimboshë Edias chiec onquequin dada uampicpadomboen Ediaspadquid chomiaid Uan choshon, Mibi icsaid ënta, quequin chuisho abi chieshënquidën mëyanondash —quepondash Esus abëd icquido chiec.

Mayan icsan buëd onquetiapimbo icmiaid Esusën bëdami-aid

(*Mat 17.14-21; Duc 9.37-43*)

¹⁴ Adec onquetanec choquin isquien matses dadpeshun abëd icquid utsibo Esusën niamboed tsusedpabon nadomboen nata quequin chiaid tantiamequidon comapenec onquecuededquin bëtimpodash. ¹⁵ Adnubien Esus chosho isash iccuededquido, Bëdamaianquid choec. ¿Atotsi aidën napatsiashe? Isnu, quetanec titinque choec: —¿Ada cho? —quepondash.

¹⁶ Adoaquien: —¿Atotsi quec ëbëd icquidbëd comapenec onquecuedede? —quepondash Esus.

¹⁷ Adshobien: —Chuiquid Dapa, mibi ismenuen con mado bëombi. Mayan icsan buëd oncamenquio yaid nec.

¹⁸ Aid Mayan icsan comapenen nebudteniac ëcbacush-ëcbacushpambo yec uedeniosh. Adecbidi, uebudash unësanec shëta chëquëdëshcaic uiosh. Adquio yanesho, Bëombique. Bëdame, cauidombi mibëd icquido chuiquin. Adoaqui bëdamenquio iccosh —quepondash mayan icsan buëd onquetiapimbo icmiaidën papa.

¹⁹ Aden chuisho tantiashe abëd icquido caic: —Esus nadatiambocquid nec quequin ëbi tantiesa mibi nepec. ¿Tedectsi icshun ëmbi chiapaden mimbi tantiabempe? Mibi tantiesa icsho ¿mitsipadembimbi tantiampe? —qeshumbic: —Madompi bec cho —capondash Esusën.

²⁰ Adsho tantiashun bëpondash. Bëshobi Esus is-tanquin mayan icsan abi dapuduedaid comapenen cui-didicamiampondash. Aden nac madompi uebudec ëcbacush-ëcbacushpambo yec cuididiquepondash.

²¹ Adsho isash: —¿Tedtsi seta matamec ad iccondashe? Chui. Tantuanu —quepondash Esus madompin papa chiec.

Adoaquien: —Bacuë ictsequi ad iccondash. ²² Cuëte dëtsiadaoid nënedeniosh abi dapuduedaidën. Actetsen nënedeniosh unësmenuequin. Mibi bëdamequidquo icquin ëbëdta tantiaquin ëbi con mado bëdameshun —quepondash madompin papa Esus caic.

²³ Adoaquien: —¿Mibi bëdamequidquo icquin ëbi con mado bëdameshun quecta ique? Nuquin Papa nada-tiambocquin naquid nec quequin tantiaquidën tantiac-padomboen Nuquin Papan naindac —quepondash Esus.

²⁴ Adsho tantiash: —Tantiemi. Ëmbi abimbo tantienquiocsho isun ëbi tantiame, Icbo —quepondash madompin papa Esus caic.

²⁵ Adsho tantiashun matses dadpen titinquec chosho isun mayan icsa chuiquin: —Matses buëd oncamenquioc-quid mibi nec. Adembidi tantiametiapimbo icmequid-bidi mibi neque. Ambo tabadenquo yec dapuduen —capondash Esusën.

²⁶ Aden chiaquien sidquec madompi cuididiquenubi dapuduempondash. Adnubien unësacimboec madompi uesho isash: —Unësosh —quepondash isquido. ²⁷ Adnubien madompi mëdintanquin Esusën uëtsëndopondash. Adoac abembi nidtopondash.

²⁸ Adnubien shubun puduedacsho: — ¿Atotsieshumbimbi mayan icsa dapuduemetiapimbo icpo? —quepondash abëd icquido Esus caic utsibon tantienquiocnobi.

²⁹ Adoaquien Esus: —Dapuduen quequinuidi chuibu-daqui adquidquo dapuduenesa nec. Ma Nuquin Papan nadatiambocquin napanuna quequin Nuquin Papa chuideneshun mayan icsa dapuduen cac dapuduenendac —quepondash.

Abi unës uate chuioaid
(*Mat 17.22-23; Duc 9.43-45*)

³⁰⁻³¹ Aden chianec nidaid Cadidia caid matanec nidpondash. Nidquimbi, Ēbēd icquid 12tedtsēqui chuibanu, quec utsibo ismenquo yec nidpondash Esus. Aden chuibanec nidequi: —Nuquin Papan Madombo matsesacsho bedendac. Aden bedshun meniac cuesuniac uincuempendac —quepondash Esus. Abi uincuentequid chiecshenda adec Esus onquepondash. ³² Aden chuisho bēdamboen tantienquo yequi dacuēdec ēbi bēdamboen tantiamequin chui quetiapimbo icpondash abēd icquido.

¿Mitsicquid chuiquid dapa icpec? quequin chiaid
(*Mat 18.1-5; Duc 9.46-48*)

³³ Adanec shubu dadpen icquid Capednaun caid yacno Esus choapondash. Adec choash shubun puduedshun: —¿Podquedēn choec atotsi chiec onquecuededo? —capondash Esusēn abēd icquido chuiquin. ³⁴ Adsho tantias h cuēdenquiocondash abēd icquido. ¿Esusbēd icquid mitsicquid chuiquid dapa icpeque? Tantianu, quec onquequin ambi chiaid chienquo yec tabadpondash. ³⁵ Adec tabadnubi abi tsadacnoēshi: —Cho —quiampondash Esus abēd icquido caic. Aido choacsho isash: —Chuiquid dapa ēbentsēqui icnu quequid utsi nashunquidbidi ictiad —quepondash Esus.

³⁶ Adec onqueshumbic bacuëmpi abentsëc mëdintanquin abëd icquid tabadacno nënantanquio tsadumbudpondash. Aden tsadumbudshun bacuë icuquequi: ³⁷ — Esus tantiaquid nebi quequin ismequin bacuë yuedquin nashunquid ëbi yuedquin nashunacbimboecquid nendac. Ëbi yuedquin nashunquid ëbi chomiondaid Nuquin Papa yacno yuedquin nashunoacbimboecquid neoaindac — quepondash Esus abëd icquido chiec.

Nuqui chieshënesa nuqui bëdamboen chuibanquid nec quiaid

(Mat 10.42; Duc 9.49-50)

³⁸ Adnubien utsin naid chiec Uan onquedopondash: — Icho, mimbi chiacpadomboen utsin chuisho tantiapombi. Aidën: “Esus nadatiambocquin naquidquo nec, quequin tantiembi. Aden tantiaquin aidën chiacpadomboen mibi chiembique. Dapuduen,” cac mayan icsa dapuduemposh. Adosho isun, Esusbëd icquidpenquo mibi neque. Adenda quequin chuipombi — quepondash Uan.

³⁹ Adoaquien Esus: —Padicnuna. Nadatiambocquin naquidquo Esus nec quequin abimbo tantiaquin ëmbi nacpadomboen nabanquidën ëbi icsamboen chuiti-apimbo iquec. ⁴⁰ Nuqui chieshënesa nuqui bëdamboen chuibanquid adquid nec. ⁴¹ Abimbo chiembique. Tantia. Esus tantiaquid nec quequin mibi nashunquid Nuquin Papan cuidnanquin bëdamboen naoaindac — quepondash Esus.

Icsa uanquin tantiabenabicquid ismequid cuidendac quiaid

(Mat 18.6-9; Duc 17.1-2)

⁴² Abi Esusën onquequin chuibanec: —Adembidi abi ic-sacpadomboen bëdamboen tantiabenabicquid ismequid Nuquin Papan comapenen cuidendac. Adquid abi ic-sacpadomboen ismiabicsho cuënote yuëmbocquidbëdta

tētāneshun acte dapa nēnepatecnēdan. ⁴³⁻⁴⁴ Adembidi mimbi icsamboen tantiaquin mishaid ėntiapimbocquin ismedeniāc adomboembidi utsin tantiec. Bednu quenquo yec mētaniācbimboec tsad ėnēdenquo yec chian anēdēnquiacno nidmane quiash. ⁴⁵⁻⁴⁶ Adecbidi capuquin mibi icsaid mimbi ismebeneque. Capunu quequin tantienquo yec tateshuniācbimboec tsadta ėnēdenquo yec chian anēdēnquiacno nidmane quiash. Adec mibi tsadnuc adquiecbidi mimbi ismiaid tantiec tsadendac. ⁴⁷ Adecbidi ėshĕn isec mibi icsaid ėntiapimbocquin mimbi ismedoniāc adomboembidi utsin tantiec. Ĕshĕ chicshuniācbimboec tsad ėnēdenquo yec chian anēdēnquiacno nidmane quiash ma mibi tsadacpadec mimbi ismiaid tsadoapanu. ⁴⁸ Icsa uadenequin ėnenquo yash unēsash chian anēdēnquiacno nidash unēsēnquiocshobi chodquiaid pequid macun mibi pendac. Ĕnēdenquo yec chian anēdēnquiacno mibi tabadendac. Icsadenequin ėnenquiocquid comāpenen cuidtequid nendac. ⁴⁹ Sa casecac pambid batambo yācbimboec Esuspadquid icnu quiash mibi icsaid ėnēdnuen mēmūnec mibi bēdambo yampec. ⁵⁰ Sa batambocquid bēdambo iquec. Sa batambocboedi batāpenquo yec icsasho ĵmitsipadentsi batambo icmeoapec? Sa batambocquid casecac daēdash batambo yācpadec utsibēd bēdamboec tabadta — quepondash Esus.

10

Aton chido bedshun nidmequid

(Mat 19.1-12; Duc 16.18)

¹ Aden abēd icquido chuiquin nainashic Esus aidobēdi nidaid Cadidia caid yacnoĕsh nidquin nidaid Udeya caid yacno matambidanec nidquin acte Odan caid potepondash. Ambo choash tabadsho isash padpidec matses

dadpen cho-choapondash. Adec cho-chosho isun Nuquin Papan chiaid chuibanoapondash Esusën.

² Adecbidi cho-choquid padiseyobon Esus Nuquin Papan chiaid icsamboen chuinu queshun: —Aton chido bedash bunenquio yanshun cuemec. ¿Aden naicta bēdambo iqueque? Tantuanu. Chui —capondash Esus chuiquin.

³ Adoaquien: —¿Atotsi quequin Moisesën chuiampic? —queoapondash Esus.

⁴ Adoaquien: —Aton chido bedash bunenquio yanshun, Con chido icsambocquid nec, quequin ambi tantiacpaden aton bēnēn dada uashun nidmiacsho isash, Padi, quenquiocpampic Moises —quepondash padiseyobo.

⁵ Adoaquien Esus: —Nuquin Papan chiaid tantiesa tsusedpabo yansho isash, Padi. Adenda, quenquio Moises icpampic. ⁶ Nadomboen Nuquin Papan tauapampic. Dada abentsēc uashumbic chido abentsēcbidi uashun dada menepampic. ⁷ Adomboembidi nanuec dada aton tita aton papabēd tabadenquio yec aton chido bedash abēdi ambi quēnē uaidēmbi tabadec. ⁸ Aden aton chido bedash tabadequi matses abentsēc icboedi daēdec. Matses daēd icboedi abentsēc yacbimboec tabadec. ⁹ Aden dada aton chidobēdta Nuquin Papan daēd uacsho ma cuēshēdmenquio icpanuna —quepondash Esus.

¹⁰ Aden chiash shubun puduedacsho: —Mimbi chui-boed ēbitedi tantieme —capondash abēd icquidon.

¹¹ Adoaquien: —Aton chido bedshun chudshun nidmeshun chido utsi bedquid Nuquin Papan menepampid niacquin tantiesa nec. ¹² Adembidi chido aton bēnēn bedac aton bēnē nianshun dada utsi bedmequid Nuquin Papan menepampid niacquin tantiesa neoaic —quepondash Esus.

Esus yacno bacuēbo bē-beaid
(*Mat 19.13-15; Duc 18.15-17*)

¹³ Adnubien: Con bacuë mishquin Esusën bédambo icmetsiash, quequin Esus yacno aton bacuëbo anin bë-bëpondash. Aden bë-bësho isun: —Padi. Esusën naid utsi neque. Bacuëbo buantan —capondash Esusbëd icquidon. ¹⁴ Aden nidmesho isash nëishash: —Bacuëbo nidmenda. Ma cho-chono. Anin chiacpadomboen tantiaquidquio bacuëbo neque. Adomboembidi badedquio Nuquin Papan chiaid tantiendac. Nuquin Papan shubu abentsëquën tabadquid aido nec. ¹⁵ Abimbo chiembique. Tantia. Nuquin Papan chiaid bacuëbon badedquio tantiacpaden tantiesa Nuquin Papa yacno puduedtiapimbo iquendac —quepondash Esus. ¹⁶ Aden chuitanquin bacuëbo dayumbanquin mamishec, Nëid bacuë bédambo icme, Papa, quequin Nuquin Papa chuipondash Esusën.

Na dadpen icquid chiaid

(Mat 19.16-30; Duc 18.18-30)

¹⁷ Aden bacuëbo chianec auëshquio puduanec nidshobien dada abentsëc titinquec choquin bëquedtanec danëshën sebudash tsadec: —Chuibanquin tantiamianquid, bédambocquid mibi neque. ¿Nuquin Papan shubu abentsëquën tabadnuequin atotsimbi napeba? —quepondash choboed Esus chiec.

¹⁸ Adoaquien Esus: —¿Nuquin Papabëdtabidabi mibi bédambocquid nec, ëbi cape mimbi? Nuquin Papauidt-sëqui bédambocquidquio nec ¹⁹ —quequin chiec abi onquec: —¿Nuquin Papan nadomboen nata quequin dada uamiampidtedi nabanquidta ne? Aidtedi mimbi tantiapec. Nad iqueque. Tantia: “cuesunianenda; adembidi min chidoudi chudquid icta; adembidi, ampenda; adecbidi, utsi chiec muainda; adecbidi, utsin na bedesabimboec muainda; adembidi papabëdtan titan chiaid chieshënenda.” ¿Aidtedi Nuquin Papan dada uamiampid nabanquidta ne? —quepondash Esus choboed caic.

²⁰ Adoaquien: —Abimbo chiembique. Tantia, Icho. Aidedi nabanquidquo nebi. Bacuëtsëc icquimbi adquid nabanondambi ënenquiocquin —quepondash choboed.

²¹ Adsho tantiash, Aidbëd icte bunebi, quequin ambibi tantiec Esus nadpondash: —Nuquin Papan chuiquin dada uamiaid nabanec mibi nec. Ambi dada uacmaid iquec. Aidi mimbi nabi iquec. Nadquid iqueque. Tantia. Min shubuno nidshun mitsana mimbi tantiaidquo menebanquin piucquid bedshun aton na nibëdquid meneban. Aden menebanash Nuquin Papan chiaid tantiaquidquo mibi iquendac. Adec Nuquin Papa tantiaquidquo yec ëbëd iquec cho —quepondash Esus.

²² Adsho tantiash choboed mamënenquo yec unësquio yec nidpondash con na menebantiapimbo iquebi quiash.

²³ Adec nidsho isun abitedi bëisbanec Esus: —Aton na dadpen icquidën, Con na tantiequi Nuquin Papan shubu abentsëquën tabadnu, quequin tantiauidtsec. Adquid Nuquin Papan shubun puduedesa nec —quepondash abëd icquido chiec.

²⁴ Aden Esusën chuisho tantiash, ¿Abimboda capec? quequin ambibi tantiec abëd icquido otacquo tabadsho isec Esus: —Abuido, Nuquin Papan shubu abentsëquën matses badedquo puduedtiapimbo iquec. ²⁵ Adembidi shëcuën puduedte nidaidën capuquid dapan badedquo tantiatipimbo iquec. Puduedquin ismiac puduedec. Adembidi Nuquin Papan shubu abentsëquën puduedmi-anquid matsesën badedquo tantiatipimbo iquec. Ambi tantiacpadequi puduedte bunec —quepondash Esus.

²⁶ Adsho tantiash abëd icquido, ¿Abimbobida capec? quetsëcquiec onquecuededpondash. Adec tabadequi: —Ambi tantiacpadequi puduedtiapimbo noc ¿tsutsi puduedquid icpeba? —quepondash abëd icquido Esus chiec.

²⁷ Adoaquien comapenen bëisec Esus nadpondash: —Ambibi tantiaquin naquid Nuquin Papan shubu abentsëquën puduedtiapimbo iquec. Matses abibi puduedtiapimbo noc Nuquin Papambien abi yacno yuedanquid mibi tantiamendac —quepondash Esus.

²⁸ Aden chiaquien Petedo nadpondash: —Chuinu. Tanta, Icbo. Mibëd icnu, quequin abitedi nianondambi. Adembidi mibëd icquid utsibon abitedimbo nianondash. ¿Atotsi ëbitedi menetsia? —quepondash Petedo Esus chiec.

²⁹ Adoaquien: —Abimbo chiembique. Tanta. Esusbëd icnu qeshun Nuquin Papan shubu abentsëquën tabadte iquec quequin chuinuequidën aton shububëdta nianquin aton shubun icquid aton tied chedobëdta nianendac. Adquid ambi nianëdaidtedimbo sho ³⁰ daëd uaquin Nuquin Papan menendac. Nëbi shubu utsinutsinquec mibi puduedcuenec. Adecbidi Nuquin Papan shubu abentsëquën tabadquid abi tantiaquido mibëd icquid dadpen iquec. Adquid icnuc mibi chieshënquidbidi iquendac. Yuecash ënëdenquio yec Nuquin Papan shubun mibi tabadendac mibi chieshënquid nibëdacno. ³¹ Nidaidënsun chuiquid icboedi Nuquin Papa yacno tabadquin utsi nashunquid mibi iquendac. Adecbidi nidaidën tabadquin nashunquid icboedi Nuquin Papa yacno tabadquin chuiquid iquendac. Nashunesa yec chuiquid icboedi Nuquin Papan shubun puduedash utsi nashunquid adquid iquendac —quepondash Esus.

Ëbi unës uaindac quequin Esusën chiaid

(Mat 20.17-19; Duc 18.31-34)

³² Aden chianec Edusaden caid yacno podquedën nidec Esus bëyucanec nidpondash. Edusaden yacno padpidec

choacshobini bedshun unës uaic quequin chiashi, ¿Dacuëdenquioda ambo Esus nidoapec? quetsëcquiec abëd icquido tsyuec nidanepondash. Adnubien abi tsibanquid utsibo dacuëdecbidi nidanepondash. Adnubien: —Ëbëd icquidouditsëqui padpiden chuioanu —quiash Esus niduntidshun cho-chosho isquin naden abi mëyante chuiquin tauapondash: ³³ —Chuinu. Bëdamboen tantia. Nuquibi Edusaden yacno nidec. Ambo nidacsho ëbi bedshun ëbi matsesaid Nuquin Papan madombo isadaidbo tsusiobo menendac. Aden meniac icsaquidbimboecnuc ëbi icsamboen chuibanec onquecuededash, Icsambocquid Esus nec. Unës uamequimbien ictiad, quendac ëbi caic. Adec onqueshun ëbi buanshun isadaidpembo ancaquid ëbi meneoaindac. ³⁴ Aden meniac bedshun aidon ëbi oncain mamënshumbedequimbi dacuishtuashumbi cuestanquin buanshun ëbi unës uaindac. Aden unës uac daëdec ushash uincuenoaindabi —quepondash Esus abi uincuenta ambibi chiec.

Ëbi daëdi nashunta Acobo Uambëd quiaid

(Mat 20.20-28)

³⁵ Aden chiaquien Acobo Uambëd Esusën dayuntsëqui choash: —Mibi chuinu. Tantia. ¿Ëbi daëdshun chiacpadomboen ëbi daëdi nashunenquioda mimbi icpe? —quepondash.

³⁶ Adoaquien: —¿Atotsimbi mibi nashuneque? Ëbi chui. Tiantianu —capondash Esusën.

³⁷ Adoaquien: —Abuc nidoash chuiquid dapambo mibi icquin utsi ismequin min dayunquio ëquë tsadumbudcuenquin ëbi daëdi tsadunta —capondash Uanën Acobobëdtan Esus chuiquin.

³⁸ Aden aid daëdshun chiaquien: —Tantienquiocquin mimbi chioc. Icsaquid matsestedi nec, quequin Nuquin

Papan aido cuidenquiocquin ëbi aton madombo bëdambocquidded cuidendac. ¿Ada ëbipadquid mibi icpat-sia? —capondash Esusën.

³⁹ Adoaquien: —Ai, adquid tantiemi —quepondash.

Adoaquien: —Ai, adomboembidi mimbitsen tantiendac —quepondash Esus. ⁴⁰ Aden chiec abi onquec: —Abuc nidash chuiquidquio iquec con dayunquio ëquë tsadbudcuenec tsadec cho, quetiapimbo iquebi. Nuquin Papambien ambi tantiaidquio aden chiendac. Ëmbi padenquio iquec —quepondash Esus Uambëdta Acobo chiec.

⁴¹ Aden Esusën chiaqui abëd icquidquio utsitedi Acobobëdta Uanën chuiboed tantiash nëishcuededpondash. ⁴² Adec nëishash tabadsho isash: —Cho —quepondash Esus. Aden chomiash: —Utsi namequid isadaidpembo nec quequin mimbi tantiec. Aidon matses utsi yuaquin mëyanquin namebanec. ⁴³ Aden namesa mibi nec. Chuiquid dapa icnu quiash utsi nashunquid icta. ⁴⁴ Adecbidi tsusio icnu quiash yuabimboe yec utsin namiaid icta. ⁴⁵ Adquid icnuec Nuquin Papan madombo matsesash nidaidën tabadobi. Ancanquid iquenquio yec nashumënquidquio nebi. Adquid yec matses icsaid bedshunash ëbided cuidadec unësendabi —quepondash Esus.

Bëshuaid, Badtimeyo cuëmëdquid bëdamiaid

(Mat 20.29-34; Duc 18.35-43)

⁴⁶ Aden chiashic Edico caid yacno chonobi abi tsibanquid utsibo dadpen cho-chopondash. Ambo tabadash abitedi puduampondash. Pudianash nidquin isaquien bëshuaid, Timeyon mado, Badtimeyo cuëmëdquid podqued cuëman tsadpondash. Piucquid bednu quequin cainec podqued cuëman tsadpondash. ⁴⁷ Ambo tsadquimbi, Esus Nasaded caid yacnocquid choec, quequin utsin chiac: —Esus, Chuiquid Dapa,

Dabidën madon, ëbi tantiaquin nashun —quequin chiec cuëdpondash bëshuaid.

⁴⁸ Adec cuëdsho tantiashun: —Esus cuënenquo yec otacquo tsad —cabededpondash utsibon.

Adnubien: —Chuiquid Dapa, Dabidën madon ëbi nashun —quepondash bëshuaid comapenec cuëdoaic.

⁴⁹ Adoac nidtuidshun Esusën: —Cuënquid chome —capondash.

Adoquien: —“Chome,” queque. Nidtoash nid —capondash utsibon.

⁵⁰ Adsho tantiash bëshuaid aton dashcute bëntsecquid chicanec badedquo nidtoanec Esus yacno chopondash.

⁵¹ Adec chosho isun: —¿Atotsimbi mibi nashumpeba? —capondash Esusën.

Adoquien: —Iste bunebi, Icbo —quepondash bëshuaid.

⁵² Adoquien: —Esusën ëbi bëshuaid bëuquec quequin mimbi tantiacpadquiec mibi bëdanoque. Nidec nid —Esus quenubi isbenquiopondash bëshuaidën. Adec bëdanshun Esus nidsho isun tsibampondash.

11

Chuiquid dapabimboec yec Edusaden yacno Esus choaid
(*Mat 21.1-11; Duc 19.28-40; Uan 12.12-19*)

¹ Adec nidequi Edusaden anoentsëqui Esus chopondash. Edusaden anoentsëqui Bedpaque caid icpondash. Edusaden anoentsëcbidi Betania caid icopondash. Aidtedi macuësh Odibos caid potsembo icpondash. Ambo choash ëbëd icquid daëd shubuno nidmenu quequin tantiec nadpondash Esus: ² —Në shubu dadpen yacno nidec nid. Ambo nidshun cabayobiecquidën bacuë cani-abictscquid tënëshac tsadsho mimbi istuidendac. Aidi matses catsadabicquid neque. Aidi istuidshun tënëshaid

tëchicshun sananquin bëta. ³ Aden bedsho isun, ¿Atotsi canun aid bede? cac, Bëoaimbi. Nëid nuquin icbo bunaid nec, cata. Mimbi aden chiac, Buanec nid, quendac — quepondash Esus abëd icquid daëd chiec.

⁴ Aden Esusën chiaquien abi daëdi nidpondash. Adec nidanequimbi cabayobiecquid caniabictsëcquid shubu shëcuë cuëmano tënëshac tsadsho istuidshun tënëshaid tëchicpondash. ⁵ Aden tënëshaid tëchicsho isun: —¿Mitsipaden tantiaquin ëmbi tënëshaid mimbi tëchiqueque? Tantuan. Chui —capondash anocquidën.

⁶ Adoquien: —Tënëshaid tëchicshun bëta, con icbo quebocpaden naimbi —capondash tëchicquidën.

Adoquien: —Buanec nid —queoapondash.

⁷ Adoac Esus yacno buampondash. Aden bëshun aton dashcute bëntsecquid chicshun cabayobiecquid capucpondash ma chuiquid aidën catsadtonoeshun. Adoaidën Esus catsadtopondash. ⁸ Adembidi chuiquid Esus nec quequin ismequin utsibontsen aton dashcute bëntsecquid chichededshun podqued ansambampondash ma chuiquid dapa bëdambocquid capunueshun. Adembidi tantiaquin utsibon budëdbiecquid poddo tebededshun podqued ansambanoapondash. ⁹ Aden ansambanash matses dadpen bëyucanec nidanenubi Esus nënantanquio nidnuc aidtedbidi tsyuec choquin tsibambëpondash. Adec abitedi nidanec Esus tantiec nadec cuëdëncuededpondash: —¡Adeduya! Nuquin Papan bëdambo icmiaid ambi tantiacpadomboen chuitanta quequin chomiaid nec. Tsusedpa chuiquid dapa, Dabid cuëmëdquidën tsyuecquid, shubu abentsëqui tabadquido chuiquid dapambo choec nec. ¹⁰ Èbi chuiquid dapa Nuquin Papan abuc tabadquidën chomiaid Esus nec. Nuquin Papa bëdamboshë iquec. ¡Adeduya! —quec cuëdëncuededpondash Esusbëd nidquido.

¹¹ Adec cuëdëncuededequi Edusaden yacno cho-chopondash. Choashic Nuquin Papa tabadte shubu uashunaid quënë dadpen yacno nidash Esus puduedpondash. Adec puduedshun abitedi isbanash ushë budtsambi Betania caid yacno nidaneoapondash Esus.

Cuëte bacuëesa chiaid
(*Mat 21.18-19*)

¹² Abadiadtsashi Betania yacnoësh nidanec Esus bundo-pondash. ¹³ Adec bundoshombi cuëte icueda caid podo buntac-buntacpambo ancuenquio nidsho istuidec Esus: —Icueda podo buntac-buntacpambo podoash nideque. Isbono. ¿Bacuëshida neque? —quianec nidpondash. Adec nidquimbi icueda podouidquio icsho ispondash. Ushë utsin bacuëtiadquidi bacuëabi podopac. ¹⁴ Ad icsho isun Esusën: —Adequi bacuëesa icsho ma matsesën chenquio icpanuna —capondash. Aden chuisho tantiapondash abëd icquidon.

Nuquin Papa tabadte shubu uashunaid yacnoshon cuemi-aid
(*Mat 21.12-17; Duc 19.45-48; Uan 2.12-22*)

¹⁵ Aden cuëte chuibëtsenec choequi Edusaden yacno choapondash. Ambo choashic Nuquin Papa tabadte shubu uashunaidën puduedoapondash. Adec puduedshun piucquid bedquin piucquid sanaid cuestetedi bidiacbanquin piucquid bednun nidaidën capuquidbëdta podochoquid chedo menebanquidën tsadtetsen nebudquin icbotedi puduemebampondash. ¹⁶ Aden puduemeshun Nuquin Papa tabadte shubu uashunaid nasiadquin aton na buansho isun: —Nuquin Papa tabadte shubu uashunaid neque. Adec nasiadec capuenda —capondash Esusën chushcaquin. ¹⁷ Aden chushcashic: —¿Ëbi tabadte shubu uashunaid

matsesën ëbi onquianete shubu iquendac, quenquioda Nuquin Papa icpampic? Aden Nuquin Papan chiaid tantiesabimboecquin muaquin piucquid bedte shubu mimbi icmiayoc —quepondash Esus. ¹⁸ Aden Esusën chuisho tantiash, Icsambocquid Esus neque. Unës uatiad, quequin ambibi tantiabededec isadaidbo tsusiobo tabadcuededpondash. Utsiboen: —Chuiquid dapan chiacpadomboen Esusën chiec —quepondash. Adsho tantiash, Esus bednu, quetiapimbo yec dacuëdcuededec tabadpondash isadaidbo tsusiobo. ¹⁹ Adnubien inchëshbudtsëqui Edusaden yacnoësh nidoapondash Esus.

Cuëte bidiquiaid

(Mat 21.20-22)

²⁰ Abadiadtsashi Edusaden yacno nidoaquimbi cuëte icueda caid bidiquiacsho istuidpondash. ²¹ Aden istuidash Esusën icueda bacuësa chiaid tantiec Petedo: —Cuëte bacuëabicsho mimbi chuiboed bidiquiaye. Is, Icbo —quepondash.

²² Adoaquien Esus: —Nuquin Papa nadatiambocquin nabanquid nec, quequin tantiaquiota. ²³ Abimbo chiembique. Nuquin Papa nadatiambocquin nabanquidquo nec, quequin abimbo tantiasho isun mimbi chiacpadomboembidi naindac. Aden tantiaquin mimbi nëid macuësh cain, Mananuc tabadboedi adquiecbidi acte nantan tabadoata, mimbi cac nëid macuësh acte nantan tabadoaindac. ²⁴ Ëmbi chiacpadomboen Nuquin Papan naindac, quequin abimbo tantiaquin mimbi chuisho tantiashun Nuquin Papan adomboembidi naindac. ²⁵ Aden Nuquin Papa chuinush mibi utsin icsambocquin naid tantienquo yec bëpiscudta. Adsho abucshun isash Nuquin Papan mimbi icsa uanquin naid tantienquo yec

bëpiscudendac. ²⁶ Adenquoio mibi icsho isun Nuquin Papan mibi icsa uanaid bëpiscudenquiocquin mimbi chiaid tantiatiapimbo iquendac —quepondash Esus abëd icquido caic.

¿Mitsicquidën chuibanta caid mibi ne? quiaid

(Mat 21.23-27; Duc 20.1-8)

²⁷ Adashic padpidec Edusaden yacno choapondash Esus. Adec choash Nuquin Papa tabadte shubu uashunaidën puduedash capusho isash isadaidbo tsusiobo: ²⁸ — ¿Mitsicquidën chuibanta cac chuiquid dapabimboecquin mimbi chieque? Tantaranu. Chui —capondash.

²⁹⁻³⁰ Adoaquien: —Adembidi ¿Atotsi tantiaquin mimbi chuipe? Chui. Tantaranu. ¿Matses mentondaidën, Uan padon Nuquin Papan chuimiapadomboen nabanquinda nadiondash? Padenquoio, quequin, ¿Ambibi tantiacpadomboen Uan padon naondash, quequinda mimbi tantiapeque? En chui. Tantaranu. Aden mimbi chiac ëmbitsen mibi chiembi —capondash Esusën tsusiobo chuiquin.

³¹ Aden Esusën chuisho tantiaash udictsëc nidash isadaidbo tsusiobo onquec nadcuededpondash: — Nuquin Papan tantiamiacpadomboen Uan padon naondash, nuqui qesho tantiaash, ¿Atotsieshun aidën chiaid tantienquoio icconda? quetsiash Esus. ³² Naden Uan padon ambi tantiacpadomboen naondash, nuqui qesho tantiaashun, ¿atotsi napatsiash Uanën chuisho tantiondaidon? Aidon, Nuquin Papan chuimiaid Uan pado niondash, quequin tantiabededquin nuqui cuënoten seshunetsiash —quecuededpondash. ³³ Aden chiec onquecuededashic —¿Tsuntsin tantiamiacpadomboen Uan padon nabampondash? quequin tantienquoio iquembi —quepondash isadaidbo tsusiobo Esus chiec.

Adoaquien: —¿Tsuntsin tantiamiacpadomboen Uan padon nabampondashba? quequin mimbi chienquoio

yacpadembi ëbi chuiquin tantiamequid mibi chienquio icoaimbi —quepondash Esus abi chieshënquido isadaidbo tsusiobo chiec.

12

Tied icbo nashunta quequin chiaid

(Mat 21.33-46; Duc 20.9-19)

¹ Aden chiashic, isadaidbo tsusiobon nacpadomboen naid nec quequin tantiec utsi chiacbimboec Esus nadpondash: —Chuinu. Tantia. Icbon aton tiedën uba caiduidquio nitsinshun cuate bënitsinaidën otadnidec cuidian-cuidianec dadpen bacuëec. Sinash didiesho icbon bedec. Aid nitsinshun icbon daquënë uaic. Aden daquënë uashun yuecshun uba ënë chinun tsuc-tsucte nacnemposh. Aden nacnenshun uba ampenushe queshun isec tabadte shubutsen shubu uaposh. Aden aid shubu uash nidnuequin abi tied nashunquid, Ista, quequin chianec nidposh icbo.

² “Adec nidequi nidaid utsi yacno choash yuec tabadash, Uba sinashe. Con uba bedtan, cac, aton yua nidposh.

³ Adec nidboed tied yacno chosho isun tied icbo nashunquidon bedshun cuestanquin menenquiocquin aton icbo yacno nidmeoaposh. ⁴ Adoacsho isboshic, Uba bedtan, cac yua utsitsen nidoaposh. Tied yacno chosho bedshun cuestanquin aidtsen aton icbo yacno nidmeoaposh tied icbo nashunquidon.

⁵ “Adosho isash, Padi, quenquiocquimbidi, Con uba bedtan, cac yua utsitsen nidoaposh. Aidi tied icbo nashunquidon cuesuneposh. Adembidi, tied icbon nidmiaid utsi-utsien abi tied nashunquidon cuesosh. Aden nabanquimbi utsi-utsien cuesuneposh.

⁶ “Adsho isash tied icbo nadposh: Nëid, con madombo abentsëqui nec. Ëbi cudasaid nec. Aidi tsyuec con

tied yacno nidmembi. Aidi chosho isun, Tied icbon madombo nec, qeshun bēdamboen istsiash, qeshun aton madombo nidmeposh.

⁷ “Aden nidmiac ancuenquio chosho isash, Tied icbon madombo choeque. Is. Aton papa unēsan aton papa yacpadec icbo icoanushe qeshun tied icbo nuqui icnun aidi cuesunenuna, quecuededposh tied icbo nashunquido.

⁸ “Adec onquetanquin aton icbon madombotsen bedshun cuesuneshun daquēnē uaid mabudacquin nebudposh. ⁹ Adoacsho tantiashun ¿atotsi tied icbon napec? Naden naindac. Utsibēd aton tied yacno nidshun abi nashunuidboed cuesuneshun utsibo abi nashunquido icmendac —quepondash Esus.

¹⁰ Aden chuishumbic Esusēn: —¿Adomboembidi chuiquin Nuquin Papan dada uamiampid tantienquioda icco? Nad iqueque. Tantia.

“Shubu uanuequidēn buintad isuidaidi utsin abia nitsinaid icoaposh.

Adquiobidi Nuquin Papan chuimiaid matsesēn tantiaidaid iquendac.

¹¹ Nuquin Papan naid bēdambo iquec.

Ambi Chomiaid abi yacno yuedquid icmequin Nuquin Papan nadatiambocquin naid nec quequin abi tantiaquidēnquio tantiec”

—quepondash Esus Nuquin Papan chiampidquio chiec. Nuquin Papain shubu abentsēquēn abi tantiaquido yuedanquid nendac, quequin utsi chiacbimboec abibi chiadquin Esusēn chuibampondash.

¹² Adsho tantiash, Ēbitedishun isuidaidbimboecnuc chuibanec quequin tantiec isadaidbo tsusiobo Esus bedtiadquio icpondash. Adnubien Esus onquesho dadpenshun tantiabededpondash. Dadpen icsho isash dacuēd-

cuededec Esus bednu quenquo yec nidanepondash chieshëmënquido isadaidbo tsusiobo.

*Bec cho quequin bedshunquid nec, quequin chiaid
(Mat 22.15-22; Duc 20.20-26)*

¹³ Isadaidbo tsusiobo nidshun padiseyobo edodes-bobëdta istuidshun: —Nëidon Esus icsamboen chuimet-siash —qeshun aido Esus yacno nidmepondash. ¹⁴ Aden nidmiac Esus yacno choshon abentsëcshun Esus nado-pondash: —Ambia tantiaquid, matsesën tantiamiacpad-penquiocquid mibi yec Nuquin Papan tantiacpadomboen chuibanquidien mibi nec. Adquid icquin ëbi chui. Tanti-anu. Shocosh piucquid bec cho quequin bedshunquid, isadaidpembo ancaquid, Sesad cuëmëdquid nec. ¿Aden meniaid bëdambo iquec, quequin Nuquin Papan chiaidta nepec? ¹⁵ ¿Adambi menepeba? —quepondash padisey-obobëd edodesbo Esus caic.

Adoaquien, Ëbi icsamboen chuimenuec adec onquec, quequin ambibi tantiec: —Shocosh piucquid bec cho ma isnu —quepondash Esus.

¹⁶ Adsho tantiashun bëpondash. Adoaquien: —Sananquin isme. ¿Tsutsibimboecnuc dada uaid iqueque? Chui. Tanti-anu —capondash Esusën.

Adoaquien: —Isadaidpembo ancaquid, Sesadbimboecnuc dada uaid nec —quepondash.

¹⁷ Adoaquien: —Ai, aidën na nec. Aid bec cho, qesho meneta. Adembidi Nuquin Papa Nuquin Icbo icquin, Nata, cacpadomboen naban —capondash Esusën.

Aden bëdamboen chuisho tantiash, Bëdamboenshenda tantiapec, quequin ambibi tantiec Esus chieshënquido tabadcuededpondash.

*Abuc tabadequi, ¿mitsicquidën chido neque? chui quiaid
(Mat 22.23-33; Duc 20.27-40)*

¹⁸ Adnubien saduseyobotsen Esus yacno cho-chopondash. Unësaid uincuentiapimbo iquec quequin tantiaquido aido nepondash. Aido cho-choash nadpondash: ¹⁹—Moisesën dada uapampid nad iqueque. Tantia. chuinu. Chidochoquid bacuë tishmiabi yec unësan unësboedën chido aton utsin bedtequid nec. Aden bedshun ma bacuë tishmepanuna. Aden tishmiac unësaidën tishmiaidbimboec ma icpanuna, quequin chuiampid nec —quepondash saduseyobo. ²⁰ Aden chuishumbic: —Aden nata quequin Nuquin Papan chiaid icnuc, aton mado 7ted tishpondash. Abia tishaid canishun aton chido bedshun bacuë tishmiabi yec unëspondash. ²¹ Adsho isun abi tsibanquidën aid chidobidi bedshun bacuë tishmiambo yec unësoapondash. Adembidi abi tsibanquidën ²² aton utsi unësan aid chidobidi bedshun tishmiambo yec unësoapondash bacuë nibëdquio yec. Adecbidi dadatedi unësbudnepondash. Adecbidi chidotsen unësoapondash. ²³ Adec unësash abuc tabadequi, ¿Mitsicquidën chido aid icpatsiashe? Chui. Tantianu —capondash saduseyobon Esus chuiquin.

²⁴ Adoaquien Esus: —Nuquin Papan chiaid mimbi icsamboen tantiec. Adembidi ambi nadatiambocquin naid mimbi icsamboen tantiaoaic. ²⁵ Nad iqueque. Tantia. Unësaid uincuenash abuc tabadquin chido bedesa nendac. Adecbidi aton champi bedmesa aton papa nendac. Nuquin Papan uaido mayan bëda unësesa yacpadquiec matses uincuenash unësesa iquec caidesa nendac. ²⁶ Adembidi unësash uincuenaid tantianu qeshun ¿Moisesën dada uaid isenquioda ictionda? Aidën cuëtampi abibi nëdënquesho istanec nidtuidquin nadec Nuquin Papa onquesho tantiapampic: “Min tsusedpabon Papa nebi. Abadauanën Papa nebi. Adecbidi Isaquën Papa nebi. Adecbidi Acobon Papa nebi,” quequin Nuquin Pa-

pan chuisho tantiampic Moisesën. ²⁷ Nuquin Papan chiacpadpenquiocquin Moisesën dada uapampid nec quequin mimbibi muaquin chienda. Chuinu. Tantia. Unèsaidën Papa nebi quesa Nuquin Papa nec. Nami chodquiaid icquin Nuquin Papa tantiatiapimbo iquec. Aton nami chodquenubi aton tantiante icsho ambi uincuen uatequido Nuquin Papan tantiendac —quepondash Esus matses uincuenta iquec quequin saduseyobo tantiamenuc.

Naden nata quequin chiaid ¿mitsicquid adquidpadquid utsi nibédpec? quiaid

(Mat 22.34-40)

²⁸ Adec Esusbéd saduseyobo onquecuedednubien tsusedpabon nadomboen nata quequin chiaid tantiamequid abentséc chopondash. Bédamboen Esusën saduseyobo chuisho tantiash Esus icsamboen chuimenuc aidtsen: —Èmbitsen tantianu. Chui. Nadomboen nata quequin chiaid Nuquin Papan dada uamepampid dadpen iquec. Dadpen icnuc, ¿mitsicquid aidpadquid utsi nibédpec? —quepondash.

²⁹ Adoaquien Esus nadpondash: —Nëid chiaidpadquid utsi nibédeque. Chuinu. Tantia. “Nuquin Icbo Nuquin Papa nec. Nuquin Icbo Abentsécquiobi iquec. ³⁰ Adquid icsho ëbi tantiaquid isash bédambo iquebi camequin Nuquin Papa tantiadoneta. Adecbidi ëbi yacpadecuidi icnu quenquio yec Nuquin Papa bunacpadquiec icnu quec bédamboec tabadta. Adembidi ambi tantiacpaden tantianu quequin adombota. Adembidi aid tantiaquin bédamboen nabanquiota. ³¹ Aden nabanquin Nuquin Papa bédambo icmequin utsibo adembidi bédambo icmequin nabanta. Èbi tantiaquin utsibon ëbi nashuntiadquidi nec, mimbi cacpaden utsibo tantiaquin nashunta.” Aden nata quequin Nuquin Papan dada uamepampid nec. Aidpadquid utsi nibédec —quepondash Esus.

³² Adoaquien Esus icsamboen chuimenuc choboed nadpondash: —Mimbi chuiboed abimbo iquec. Nuquin Papa abentsëcquiobi iquec. Aidpadquid utsi nibëdec. ³³ Adembidi, ëbi tantiaquid isash bëdambo iquebi Nuquin Papa camequin tantiadoneta. Adecbidi mimbi tantiacpadomboen nainquio yec Nuquin Papan tantiacpadquiec icnu quec bëdamboec tabadta. Adquid icquin ambi tantiacpaden tantianu quequin adombota. Adembidi abi tantiaquin bëdamboen nabanquiota quequin chuitequidpadquid utsi nibëdec. Aden Nuquin Papa bëdambo icmequimbi utsibo adembidi bëdambo icmequin nabanta. Ëbi nashuntiadquidi nec, mimbi cacpaden utsibo tantiaquin nashunta, quequin chuitequidpadquid utsi nibëdec. Aden naquid Nuquin Papan bëdamboen isendac. Aden naisa, Con na Nuquin Papa menenu, qesho Nuquin Papan bëdamboen istiapimbo iquendac —queoapondash choboed.

³⁴ Aden choboedën bëdamboen chuioasho tantiaash: —Nuquin Papan shubu abentsëquën tabadaid mimbi bëdamboen tantiatsempoc —quepondash Esus.

Adoac Esus icsamboen chuimenu quetiapimbo icpondash utsibo.

¿Tsuntsin mado Quidistu nepec? quiaid

(Mat 22.42-46; Duc 20.41-44)

³⁵ Abi icsamboen chuimenuquid utsi nibëdnuc Nuquin Papa tabadte shubu uashunaidën tabadquimbi Esusën Nuquin Papan dada uamiampid chuibanquin nadopondash: —Nuquin Papan chomiaidquio tsusedpa Dabidën mado nendac, quequin tsusedpabon chiaid tantiamequidon chiec. ¿Atotsi chuiquin naden chieque? Tantia. Chuinu. ³⁶ Naden Nuquin Papan Mayanën Dabid chuimiampic:

“Icbo utsi icsho mibi chiembique. Tantia, mado, quequin chiec Icbo Dapa nadpampic:

Ĕquē con dayun abiucquio cainec tsadec cho ma mibi chieshēnquidtedi mimbi namiaid ma icpanu,” quequin chuipampic. ³⁷ Aden Nuquin Papa icbo dapanquio aton dayunquio chomiaid chiec Dabid pado, Con icbo nec, quiashic, ¿mitsipadquiec, Con mado nec, queopampic? Nuquin Papan chometequid, aton mado, Dabidēn icbo yec ¿mitsipadectsi Dabidēn tsyuecquid icoapec? —quepondash Esus abibi chiadequi.

Aden chiec onquesho tantiash badedquio tantiatiadquio yampondash utsibo. Bēdamboen chiec, quequin comapenen tantiapondash.

Nuquin Papan chiaid tantiamequidon chuisho tantienda quiaid

(Mat 23.1-36; Duc 11.37-54; 20.45-47)

³⁸ Aden tantiamequimbi Esusēn nadopondash: — Tsusedpabon nadomboen nata quequin chiaid tantiamequidēn chuibansho tantienda. Aido nadquid iqueque. Tantia. Tsusiobimboec isadnu quiash abi dasiuidaid ēnapen icquid dasiuidtenequid aido nec. Adecbidi tantiaquidquio yec tsusiobimboec isadnu quiash aton mat-ses dadpen yacno capuquid nec. ³⁹ Adomboembidi ēbi isoanu quiash Nuquin Papan chiaid chuibante shubun puduedash tsusiobēd tsadec. Adomboembidi ismenu quiash isedquido dadpen yacno choash shubu icbon dayunquio tsadoaic. ⁴⁰ Aido bēdamboen nashumbimboen nianten na ampequid nec. Adembidi bēdambocquid nec camenuen yuen Nuquin Papa chiec. Adquid comapenen cuidtequid nendac —quepondash Esus.

Nuquin Papa tantiaquin nianten meniaid

(Duc 21.1-4)

⁴¹ Aden chiashic aton na bedtequid sandote tabēcaid tabadacno choash isec Esus uano tsadpondash. Nuquin

Papa tabadte shubu uashunaid tantiaquin nashunquidën nacnentsiash quequin aton na bedtequid bë-bëquin sandobansho isec tsadpondash. Adec tsadquin isquimbi aton na dadpen icquidën aton na bedtequid sando-sandonobi ⁴² aton na daëdpactsëcquidquio niante choquimbi aton shocosh piucquid daëdquiobictsëcquid sandopondash aton na utsi nibëdquiocnoc.

⁴³ Adosho isun abëd icquido chomeshun Esusën nado-pondash: —Abimbo chiembique. Tantia. Niante aton na bedtequid dayun uanu quenquioctscëcquin Nuquin Papa tantiaquioquin sandoquidquio nec utsibon aden sandoenquiocnobi. ⁴⁴ Utsibon aton na bedtequid dadpen uesenquiocquin sandobededposh. Aido daëdpact-sëc icquid sandoacbimboen sandoquido nec quequin tantiembi. Adquidpenquio niante nec. ¿Bednun tedtsimbi dayunoape? quenquiocquin aton na daëdquiobict-sëcquidi nibëdquiocnoc sandoposh nianten. Dadpen icquid sandoacbimboen sandosho aid isembi —quepondash Esus.

13

*Nuquin Papa tabadte shubu uashunaid chic-chicte chiaid
(Mat 24.1-2; Duc 21.5-6)*

¹ Aden chianec Nuquin Papa tabadte shubu uashunaidën puduenubien: —Nuquin Papan shubu cuënote nacnenaid bëdaidquio iqueque. Is, Icbo —quepondash abëd icquid abentsëc Esus caic.

² Adoaquien: —¿Nëid shubu dapa isecta ne? Shubu uaquin cuënote dapa tsindonëdaid mimbi nëbi isaid chic-chicac nibëdquiendac —quepondash Esus.

*Abitedi naimbudte tauanun ismete chiaid
(Mat 24.3-28; Duc 21.7-24; 17.22-24)*

³ Aden chiashic auëshquio nidanec macuësh Odibos caid yacno tabadtuidpondash Nuquin Papa tabadte shubu uashunaid uano tsadnuc. Ambo tabadec abëd icquid 4ted icpondash. Petedo, Acobo, Uan, Andedes aidede icpondash. Utsibon tantienquiocnoc aidon: ⁴—Cuënote nacnenaid nebudte mimbi chuiboed ¿mitsipadën nebudte icpeque? Tantianu. Èbi chui. Adembidi aidi tauanun ismete ¿atotsi icoapeque? Tantianu. Aid chuioa — capondash.

⁵ Adoaquien Esusën nadopondash: —Muaquin chiaid tantiamane qeshun Nuquin Papan chiaid isbanisbanquiota. ⁶ Nuquin Papan chomiaid nebi quec muaquid cho-choendac. Aid chosh, quequin chiac utsin-utsinquien, Abimbo caic, quequin tantiabededendac. ⁷ Adecbidi cuesnancuededec quendac. Adembidi cuesnancuededosh, quequin chuituidsho tantiaoaindac. Aden chuituidsho tantiash dacuëndenda. Ad icnuc abitedi naimbudte ushë choabi iquendac. ⁸ Ai, adquio iquendac. Adashic abëd tabadquidobëdi cuesnancuededendac. Adecbidi abi ancaquid dapan, Cuestan, quequin nidmiac nidaid utsin icquidobëdi cuesnancuededoaindac. Adecbidi utsi-utsiec yacno nidaid ishcludendac canchednuec. Adecbidi bunquiete iquendac. Aidedi icsamboshëcquid taëyendac.

⁹ “Adquid yanubi Nuquin Papan chiacpadomboen nabanec tabadta. Mibi bedshun, Icsambocquid neque. Cuidta, quequin tsusio utsibo menenun mibi buanendac. Adembidi bedshun Nuquin Papan chiaid chuibante shubuno buanacsho nuqui tsusiobon cuesendac. Adembidi bedshun isadaidpembo ancaquid dapabo yacno buanaqui mimbi tantiaid Nuquin Papan chiaid mimbi chuibanendac. ¹⁰ Nuquin Papa yacno yuedanquid iquec quequin mimbi chiendac. Nidaidedi yacnoshon aden Nuquin

Papa tantiaquidën chuitiad. Aden chiabicnuc abitedi naimbudtiapimbo iquec. ¹¹ Adembidi, Icsamboen naquid nec, quequin muaquin bedshun icsaquid cuidnuequid yacno mibi buanaqui ¿atotsimbi cape? quequin mimbibi tantiec tsadenda. Nuquin Papan Mayanën mibi tantiami-acpadomboen mimbi chuibanendac.

¹² “Adembidi Nuquin Papan chiaid tantiesan aton ut-simbo Nuquin Papan chiaid tantiaquid bedmec, Nëid cuesuneta, quendac. Adembidi aton papan aton bacuë cuesuneta, caindac. Adembidi aton bacuëbo tantiesa icquin aton papan chiaid niacquin adembidi aton titan chiaid niacoaquin cuesunemendac. ¹³ Esus tantiaquid chieshënquid dadpen iquendac. Adquidën mëyanaqui Esus tantiaquid nebi quec niaquesa icta. Aden niaquen-quo yec unësash Nuquin Papa yacno nidacsho bëdambo icmiaid mibi iquendac.

¹⁴ “Adnubien Nuquin Papa chieshënte ushë choendac. Aid chonoc Edusaden yacno abi chieshënquid dapa choash, Nuquin Papa caid nebi, quiash Nuquin Papa tabadte shubu uashunaidën tsadendac. Adsho isash cuesunenushe quiash anoentsëqui icquido cuenen-quiocboedi ma cuempanuna. Abimbo chiembique. Bëdamboen tantiata caimbi. ¹⁵ Adecbidi shubu macano pada-padapambo yacno tabadquido yec umanuc dectatote uaid dectandoaidën budanec con na bednu quenquo yec cuenta. ¹⁶ Adecbidi aton tied nantan tabadquid yec aton dashcute bëntsecquid chicshun dectanaid bednuec bidiadenquo yec badedquo cuenta. ¹⁷ Bacuë usunquid adecbidi bacuë chishmequin buanquid badedquo cuenti-apimboesho mëyampec. Adquid tantiec utsibo unësquo icchitec. Nuquin Papa chieshënte ushë icsamboshë iquendac. Adnuc badedquo cuenta. ¹⁸ Nuquin Papa chieshënte ushë icnuc ma ue dapa sequenquiocpanuna,

quequin Nuquin Papa chuided-chuidedta. Adoac ma bad-edquio cuempanu. ¹⁹ Comapenen Nuquin Papa chieshën-quin abi tantiaquido icsa uaquin mëyanendac. Yuen naindac. Adoaidpadquid ënden nibëdondash. Adecbidi adoaidpadquid nibëdendac. ²⁰ Nuquin Papa ëmenuen chuideneta. Nuquin Papa chuiquin, Chën, Papa, mimbi cainquiocnoc matsestedi nibëdtsiandac. Ëbi tantiaquid ambi cuënaido tantiec, Chën, quequin Nuquin Papan ëmendac. ²¹ Nuquin Papa chieshënte ushë icnuc, Nëid, Quidistu, Nuquin Papan chomiaid neque. Isec cho, qesho tantienquio icta. ²² Aid ushë icnuc, Nuquin Papan chomiaid nebi, quec muaquid dadpen cho-choendac. Adecbidi, Nuquin Papan chuimiaid nebi, quec muaquid dadpembidi iquendac. Nuquin Papan cuënaido ëbi tantiaquid icmenu quequin abi chieshënquidombidi nadatiamboquin nabanendac. Adosho isun ëbi tantiaquidëmbi utsin-utsinquien tantiauidtsendac adquid. Nuquin Papapenquio aid nec, quequin Nuquin Papambo tantiata. ²³ Ad iquendac quequin chiombique. Ad icnuc chieshenquiocquin Nuquin Papan chiaid tantiaquiota —capondash Es-usën.

Nuquin Papan madombo choaid
(*Mat 24.29-35, 42-44; Duc 21.25-36*)

²⁴ Aden chiash abi onquec: —Adnubien Nuquin Papa chieshënte ushë nidan inchëshquio yanendac. Badi-adën ushëbëdtabi inchëshën chënquequid nibëdquiocnoc unës uaindac. ²⁵ Adecbidi uispa paëdted-paëdtedendac. Adecbidi abuc tabëcaid nibëdnuc ambo icquido Satanasbëd icquido ¿mitsimbo nuqui cuempeba? quendac.

²⁶ “Adnubien Nuquin Papan madombo matsesaid ëbi choasho matsesën isendac. Abu ushun nadatiambo yec ushumbo yec bëdaidquio iquequi ëbi choasho isendac

matsesën. ²⁷ Adnubien Nuquin Papan uaido mayan bédabo, Ĕmbi nidtan, cac nidanendac. Nuquin Papan cuënaido bednuec nidaidtedi yacno nidaneshun bedbanash ěbi tsadacno choec, Bëombi, quetuidendac bedtanec choquido —quepondash Esus.

²⁸ Aden chiashic: —Abi chiembique. Tantia. Suc seccuduquiac něbi cunquecuenec, quequin matsesën tantiec. ²⁹ Adomboembidi ěmbi chuibamboed tauadosho isash Nuquin Papa chieshěnte ushě choeque. Ista, quec chuinanta. ³⁰ Abimbo chiembique. Tantiata. Ĕmbi chuibamboed naimbudabicnuc ěmbi chuibamboed tantiaquiděn tsyuecquido naimědbudenquio iquendac. ³¹ Aden matsesën isnubien nidaidbědi abu ěnědendac. Ĕmbi chiaidtedi abimbo yec adquiouidi iquendac.

Něid ushěnquio tauadoendac, quetiapimbo matses iquec quiaid

³² “Adnuc něid ushěnquio Nuquin Papa chieshěnquin tauaindac quetiapimbo matses iquec. Ambi uaido mayan bědabo adecbidi quetiapimbo icoaic. Aton madombo yec adtiapimbo iquebi. Nuquin Papa abentsěcquobien adquid tantiaquid nec. ³³ Aid tauadote ushě choaid tantiatiapimbocquin Nuquin Papan chiaid niacmane qeshun isbanquin nabanta. ³⁴ Nad iqueque. Tantiata. Chuinu. Utsibo yacno nidnun aběd tabadquido naden chuiposh. Min utsibo chieshěnenquiocquin shubu isquid icta quequin chianec nidposh. ³⁵ Adec icbo nidan abi choate ushě mimbi tantienquio iqueque. Běshunenquiocquin tantiaquiota. Inchěshbudtsěqui choapatsiash, quequin tantiata. Adembidi inchěshpotsembo chopatsiash qeshun adembidi tantiaquiota. Adembidi, cachina cuědanubi chopatsiash, qeshun isucunshun tantiadenequiota ³⁶ ěmbi tantienquiocnoc con icbo chochitondac, qeshun. ³⁷ Adquiecbidi bědamboec tabadquin

Nuquin Papan chiaid isted-istedta Nuquin Papa chieshën-quidën niacmenushe qeshun —quepondash Esus.

14

Esus cunesunete bunaid chiaid

(Mat 26.1-5; Duc 22.1-2; Uan 11.45-53)

¹ Adashic, bëyuc tishaid unësменуequid aton shubu datamenuequin Isadaidbo tsusedpabon nidaidën capuquid yuaded cunesunepampic. Aid tantiaid ushëbëdtabi pan bidisquesa tantiaid ushë Pascuas caid daëdec ushash choendac. Aid chonoshe qeshun isadaidbo tsusiobon Esus nibëmbededpondash. ² Aden nibë nec: —Pascuas ushë tantiec Edusaden yacno matses dadpen cho-choec. Matses dadpen choabicnuc ismenquiocquin Esus bedtiad. Bedsho isash, Padi. Bedenda, queuidash nëishun comapenen nuqui cuestsiashe —quepondash isadaidbo tsusiobo.

Esus unësec qeshun nacbimboen noadte machiunte chiaid

(Mat 26.6-13; Uan 12.1-8)

³ Adnubien Betania caid yacno tabadquin Esusën Simonën shubun puduedshun pepondash. Simon daushac bimboecquid, nami mishac tantiadenquiocquid icsho Esusën bëdamaid nepondash. Adec puduedshun pec tabadnubi comapenec noadquid bëec chido puduedpondash. Piucquid dadpen menequin comapenec noadquid bedquid chido nec. Ambi bedaid sedunte postichoquid dëusunaid dëchictanquin Esus chidon machiuimpondash.

⁴ Aden machiuinsho isash utsibo nëishun: — ¿Atotsieshun machiuino? ⁵ Noadte menequin piucquid dadpen bedshun aton na nibëdquid dadpen menetsiandac —quec onquecuededpanëdash Esus machiuimboed chido

chushcaic. ⁶ Aden chushcasha tantiashien Esus onquec nadpondash: —Chushcainda. ¿Mitsanada nediosh? Ambi noadte machiuimboed bēdaidquoio nec. ⁷ Badiadquidēnbadiadquidēnquieci ēnēdenquoio yec aton na nibēdquid ēnabi iquec. Aidi menenu queshun mimbi menepec. Ēbien nashuntiapimbo iquendac. ⁸ Ēbi unēsabicnuc nēid chidon tantiaquin chococanuequin nacbimboen noadte machiuimpaboc. ⁹ Abimbo chiembique. Tantia. Nuquin Papan shubu abentsēquēn tabadaid chuiquimbi ēbi machiuimboedēn naidtsen tantiaquidon chuibenchuibenendac —quepondash Esus.

Esus bedmembi, Udas quiaid

(Mat 26.14-16; Duc 22.3-6)

¹⁰ Adnubien Udas Iscadiote, Esusbēd icquid abentsēc, Esus bedmenu, quianec isadaidbo tsusiobo yacno nidpondash. ¹¹ Adec nidequi isadaidbo tsusiobo yacno choshon Esus mibi bedmembi quequin chuituidac bēdambo icpac caondash aido. Adembidi: —Esus ēbi bedmesho isun piucquid mibi menembi —quecuededpac caondash. Adsho tantiash nidanec, ¿Mitsipadentsimbi bedmepe? quec tabadquin caimpac caondash Udasēn.

Nidaidēn capuquidded cuesuniaid abēd icquidobēdtan pi-aid

(Mat 26.17-29; Duc 22.7-23; Uan 13.21-30; 1Cod 11.23-26)

¹² Adashien penun isadaidbo utsibon nidaidēn capuquid cuesunenubien: —Cuesuniaid pambid penu queshun, ¿mitsishunquiembi nacnempatsia? — quepondash Esusbēd icquido.

¹³ Adsho tantiash Esus abēd icquid daēd chiec nadpondash: —Edusaden yacno nidquimbi dadan acte bēsho istuidash tsibananec aibēdi nidta. ¹⁴ Aden aid tsibanec puduedash, ¿Ēbi tabadte quēnē mitsimbo iquec? ēbēd icquidobēdtan penu, quiosh chuiquid, quequin shubu

icbo chuita. ¹⁵ Aden chiac buanshun dectatomesun abuc quënë dapa mibi ismendac. Ambo pete sante cuate iquendac. Ashunquo penun nacnenta —quepondash Esus ambi daëd chuimiaid caic.

¹⁶ Aden chiac abëd icquid daëd Edusaden yacno nidquin Esusën chiacpadomboen bëquedshun tsibananash puduedshun penun nacnempondash.

¹⁷ Adnubien inchëshbudtsëqui aid daëdtsëqui yacno Esusbëd icquid utsibo chopondash. ¹⁸ Adec choash pec tabadnubien: —Abimbo chiembique. Tantia. Èbëdtan pequid abentsëcshun isadaidbo tsusiobo ëbi bedmendac —quepondash Esus.

¹⁹ Adsho tantias, Icsambo iquec, quequin tantiec: — ¿Èbida chienquo ique? —quepondash abëd icquidtedi.

²⁰ Adoaquien: —Mibëd icquid nebi, quec mibitedi. Padnuen abentsëcshun ëbëdtambi pete cuëshën ënë punshun pequidën ëbi chieshënkuido bedmendac. ²¹ Nuquin Papan chuimiapadomboen aton madombo chidon tishac matsesaid ëbi unës uate anoentsëqui yanec. Èbi bedmequid icsamboshë iquendac. Abi cuidte icsamboshë icnushe qeshun aidi tishenquiocpatecnëdan —quepondash Esus.

²² Adashic pebededquin pete bedshun Nuquin Papa chiec onquetanquin pete cuësh-cuëshun abëd icquido menebanquin: —Nëid pete cuëshë ëmbi piuid con dad-abëd daëdacpadquiec Esus unësash abi tantiaquid ëbi icnuc Esus ëbëdi iquec quequin tantiaata —capondash Esusën.

²³ Adembidi dëshote bedshun uba caid actequid icnuc Nuquin Papa padpiden chuishun abëd icquido menebanac acpondash.

²⁴ —Nëid acquin Esusded Nuquin Papan cuidac aton intac siebudpamboec unësposh. Aton madoded cuidshun Nuquin Papan ëbi padenquio iquec quequin nëid acquin tantiata. ²⁵ Uba caid ënë nidaidëshun padpiden aquenquiocquimbi Nuquin Papan shubunshun actequid chuca mibëdtambi aquendambi —quepondash Esus abëd icquido caic.

²⁶ Aden chiash Nuquin Papan naid chiec cuëdënanec macuësh Odibos caid yacno nidoapondash.

Esus tantiesa nebi quequin Petedon chuite chiaid

(Mat 26.30-35; Duc 22.31-34; Uan 13.36-38)

²⁷ Adshumbic Esusën: —Esus tantiaquid nebi quesa mibitedi nendac. Nuquin Papan chiampidpadquid mibitedi nad iqueque. Chuinu. Tantia, mibi.

“Abi tantiaquid bëyucanquin yuedquid unës uaimbi. Adosho isash abëd icquido cuenec cuëshëd-cuëshëdendac,”

quequin Nuquin Papan chuipampid nec. ²⁸ Unës uac uincuenash Cadidia yacno ëbia nidoaindabi. Mibitsen ambo nidta —capondash Esusën abëd icquido chuiquin.

²⁹ Adoaquien: —Esus tantiaquid nebi quenquio utsitedi icnuc ëbien padenquio iquec —quepondash Petedo.

³⁰ Aden Petedon chuisho tantiash: —Abimbo chiembique. Tantia. Nëid inchëshëmbi cachina bënë daëdec cuëdanabicnuc Esus tantiesa nebi, quequin mimbi tedesteden chiendac —quepondash Esus Petedo caic.

³¹ Adsho tantiash: —Esus tantiaquid mibi icsho mibi aidbëdta unës uaimbi, cac, Esus tantiesa nebi, quenquio iquendabi —quepondash Petedo comapenec onquec. Adecbidi Esusbëd icquidtedi onquepondash.

Quetsemani caid yacno choash tabadaid chiaid

(Mat 26.36-46; Duc 22.39-46)

³² Adashic cuëte odibo caid dadpen icsho Quetsemani quequin cuënacno choash nidtuidash: —Nuquin Papa chuinuec udi nidebique. Nëmbobi tabad —quepac caondash Esus abëd icquido caic.

³³ Aden chianec Petedo, Acobo, Uan nëidted cho quianec bëyucanec nidec Esus, Matsestedi icsaid cuidtequid ëmbi bedshunsho isun Nuquin Papan ëbi isti-apimbo iquec, quequin tantiec unësquioshë yampondash.

³⁴ Adquio iquec: —Ëbibi unësquioshë yec udictsëc nidebi. Chieshtomane qeshun nëmbobi tabadquin Nuquin Papa chuiban —quepac caondash Esus ambi nëid 3ted, Cho, caboed chiec. ³⁵ Aden chianec udictsëc nidash Nuquin Papa chuinuec nidaidën uebudash uec onquec: —¿Adabi adquid icmenquioctsia? Papa —quepac caondash Esus Nuquin Papa chiec. ³⁶ Aden chuishumbic: —Papa, mimbi natiapimbo ictequid nibëdec. Adquid icquin matses cuidtequid bedshunquid con mado icmenquio iquembi qeshun mimbi adoenquioctsiandac, Papa. Ëbi bunacpaden nainquiocquin mibi bunacpadomboen nata, Papa —capac caondash Esusën Nuquin Papa chuiquin.

³⁷ Aden chiash choquin abëd choboed 3ted icquid usho istuidec Petedo caic: —Simon, ¿ushecta ne? ¿Ëbibi chieshmane quiaash yuecpactsëc iquec ushenquio yec tabadtiapimboda icco? ³⁸ Chieshmane qeshun Nuquin Papa chuita Nuquin Papan chiaid niacmenuequidën Satanas caidën chiaid tantiamane qeshun. Chieshenquio iquebi quiaash dacuëdash badedquio mibi chieshendac —quepac caondash Esus.

³⁹ Aden chiash ambi Nuquin Papa chuibocno nidoashun ambi chuibocpadembi Nuquin Papa Esusën chuioapac caondash. ⁴⁰ Adtanec choashumbic abëd choboedo adecbidi ushacsho istuidoapac caondash. Ushcasquiec

tabadec, Ushenquiocobi, quequin chuitiapimbo yec otacquo tabadpac caondash.

⁴¹ Adnubien padpidec nidoashun Nuquin Papa chuoatanec choec: —¿Uimabudashta tiboquec ushec ne? Padi. Ushenquio yec isucun. Nuquin Papan madombo chidon tishac matsesaid ëbi icsho nëbimbobi ëbi chieshënquidon bedmeque. ⁴² Nidtoash ëbëdi nid. Ënden choaye. Is —quetuidpac caondash Esus abi bednuec choquido isec.

Esus bedshun buante chiaid

(Mat 26.47-56; Duc 22.47-53; Uan 18.2-11)

⁴³ Aden chuinubien Esusbëd icboedquiobi Udasbëd matses dadpen cho-chopondash. Cho-choquid utsi-utsiec chështe sanampamboec chonobi utsi cuate sanampamboec chopondash. Aided Udasën chiac isadaidbo tsusiobon chomiaido nepondash.

⁴⁴ Esus bednuequid tantiamenuen ambiabi Udasën: — Ëmbi tanchoccaid mimbi bedtequid nendac. Aidquiobi bedshun buanta. Cuenushe qeshun bëdamboen ista — capac caondash. ⁴⁵ Aden chiashic aidobëdi choquimbi: — Icho —quequin Udasën Esus tanchoccatuidpondash.

⁴⁶ Aden Udasën tanchoccasho isun Esus bedpondash.

⁴⁷ Adnubien anocquid abentsëcshun chështe sananquin isadaidbo tsusio dapan ancaidën pabiate auc abentsëc pateshunepondash.

⁴⁸ Adnubien: —¿Cuesanquid Esus nec, qeshun utsin cuate sananubi utsibon chështe sananec ëbi bedecta chochoec ne? ⁴⁹ Badiadquidën-badiadquidënquiec Nuquin Papa tabadte shubu uashunaid umanuc daquënë uaidën tabadquin matses tantiamenuen chuibanionibi mibitedi tabadnubi. Ambo icshobi ¿atotsieshumbini mimbi bedenquicpo? Nuquin Papan chiacpadomboen nëbi mimbi ëbi bedec, —quepondash Esus abi bedquido caic. ⁵⁰ Adec

onquesho tantiashun cuenquin abëd icquidtedishun Esus niampondash.

⁵¹ Adec cuenubini nëbi caniquid yequi Esus tsibananec nidpondac. Dashcute isad-isadquid dasiuidanec nidquin Esus tsibampondambi. Aden tsibanshobi Esus chieshënquidon bedpondashi. ⁵² Aden bedac dasiuidte bëdaidquio nianec dadauidquio cuempondabi.

*Isadaidbo tsusiobo iccuededacno Esus buante chiaid
(Mat 26.57-68; Duc 22.54-55, 63-71; Uan 18.12-14, 19-24)*

⁵³ Adnubien, isadaidbo tsusio dapa, matses tantiec Nuquin Papa chiec onquequido yacno Esus buampondash. Aden buanec puduednu quiacnombobi isadaidbo tsusiobo utsibo iccuededec tabadpondash. ⁵⁴ Aden Esus buanubi tsyuec choquin Petedo cuemboedën tsibananec isadaidbo tsusio dapan shubu umanuc daquënë uaidën puduedpondash. Adec puduedash Esus cuenushe quequin isquido tabadacno ambotsen cuëte cuëec tsadpondash Petedo. ⁵⁵ Adec Petedo tsadnubien Esus unës uate bunquin Esus icsambocquid nec quequin chuiquid ¿Ada icpec? quequin nibënquin adquid tsusiobon istuidabicpondash. ⁵⁶ Abimbo chiacbimboen dadpenshun chuibededpondash. Aden chuiquin abentsëcshun chiacpadomboen chienquiocquin utsin chuiopondash.

⁵⁷ Adnubien, Chuinu. Tantia, qeshun Esusën chiacbimboen utsi uain chuipondash utsibon. ⁵⁸ Aden chuinubien utsi onquec: —Naden Esusën chuisho tantiom-bique. Tantia. Chuinu. “Nëid, Nuquin Papa tabadte shubu uashunaid chicbanendambi. Aden chicbanshumbic daëdec ushquin matsesën naidpenquio isadnuc ëmbibi naindambi,” quequin Esusën chuipondash —quepondash utsi. ⁵⁹ Aden abentsëcshun chuinubi utsin aden chienquiocquin chuipondash.

⁶⁰ Aden chuisho tantiash isadaidbo tsusio dapa nënantanquio nidtoash nidquin: —¿Mimbi chiacpadomboen chiecta nec? ¿Abimbo chuiquidta nëidtedi neque? Chui. Tantienu —capondash isadaidbo tsusio dapan Esus chuiquin.

⁶¹ Adsho tantiash ëcbedenquio yec otacquo nidsho isash: —¿Nuquin Papan chomiaidquo, Quidistu caid, Bëdambocquidën mado nebi, quecta mibi ique? — queoapondash isadaidbo tsusio dapa Esus caic.

⁶² Adoquien Esus: —Ai, aidi nebi. Nuquin Papan madombo matsesaid abuc nidoashic Nadatiambocquidën dayun abiucquo tsadash abu ushun ëbi chosho matsesën isendac —quepondash Esus.

⁶³ Adsho tantiash, Icsamboen chiec, quec abi daëd dasiuidaid bëntsecquid dached-dachedquiash: —¿Atotsieshun Esusën icsamboen naosh, quequin chuimenuen utsi nibëmpe nuqui? ⁶⁴ Nuquin Papa icsamboen Esusën chuisho mimbi tantioc. ¿Midapaden mimbi chieque? Tantienu. Chui —capondash isadaidbo tsusio dapan tsusio utsibo chuiquin.

Adoquien: —Icsambo iqueque. Unës uametiad — quecuededpondash.

⁶⁵ Adsho tantiashun Esus dacuishtuaquin utsibon tauapondash. Adotanquin dashcuten bëpucshun ambibi cuestanequi: —¿Tsuntsin mibi cuesposh? Comapenen tantiaquidquo mibi neque. Ëbi chui. Tantienu — capondash Esus chuiquin.

Adnubien cuenushe quequin Esus bedshun sondadon comapenen cuesbededpondash.

Esus ëmbi tantiacmaidquo nec quiaid
(*Mat 26.69-75; Duc 22.56-62; Uan 18.15-18, 25-29*)

⁶⁶ Adnubien Petedo umanuc daquënë uaidën tsadnubi isadaidbo tsusio dapan yua chido chopondash. ⁶⁷ Choshon Petedo cuëte cuëec tsadsho isun: —Nasaded caid yacnoquid Esusbëd icquid mibi nec —capondash.

⁶⁸ Adoaquien, Esusbëd icquid nebi, quetiapimbo yec Petedo: —¿Atotsi mibi quepe? Tantienuo yec tsadebi —quepondash.

Adtanec puduedte shëcuë anoentsëqui nidtuidash tsadnuc cachina bënë cuëdpondash.

⁶⁹ Adec Petedo ambo tsadsho chido yuaidën istuidtanquin padpiden: —Esusbëd icquidquo nëid nec —quequin anocquido chuiopondash.

⁷⁰ Adoaquien: —¿Aidbëd icquidtabi nedi? —quepondash Petedo.

Adnubien yuecpectsëc yash: —Aidbëdi Cadidia yacnoquid mibi nec —quepondash ambobidi tabadquido.

⁷¹ Adoaquien: —Ëmbi tantiacmaidquo nec quequin abimbo chiemi. Ëmbi abimbo chienquo icsho ma ëbi chian anëdëncuicno Nuquin Papan nënepanuna —quepondash Petedo comapenen chiec.

⁷² Adnubien cachina padpidec cuëdpondash. Adsho tantiahsun, “Cachina daëdec cuëdabincuc ëmbi tantiacmaidquo Esus nec, quequin mimbi chiendac tedestedec onquequin,” quequin Esusën chioshi quequin tantiec unësquo yanec shubianquiopondash Petedo.

15

Pidato yacno nidshun Esus meniaid

(Mat 27.1-2, 15-31; Duc 23.1-5, 13-25; Uan 18.28-19.16)

¹ Badiadnuc isadaidbo tsusiobo iccuededpondash. Nëidted icpondash: isadaidbo tsusio dapabo, tsusio utsibo, tsusedpabon nadomboen nata quequin chiaid tantiamequido. Adec iccuededash onqueshun Esus

mëtaneshun buanshun isadaidpembe ancaquid Pidato caid menepondash. ² Aden meniac Pidato: —¿Isadaidbo ancaquidta mibi neque? Ĕbi chui. Tantianu —capondash Pidaton Esus chuiquin.

Adoaquien: —Mimbibi aden chuipayoc —quepondash Esus.

³ Adnubien, Esus icsaded-icsadedosh, quequin chiec isadaidbo tsusiobo onquecuedednuc cuëdenquo yec Esus tsadpondash. ⁴ Adec tsadsho isun: —¿Ĕcbedanenquo yec otacquioda tsade? Mibi icsaid dadpen nëidon chuibanec —Pidaton caqui ⁵ adquiecbidi Esus tsadpondash. Adec tsadsho isash ¿Mitsipadquidquo Esus nepec? Utsimbien, Icsapenquiocquid nebi, quequin chuipec, Aden chienquo Esusën iquec, quequin ambibi tantiec Pidato tsadpondash.

⁶ Adashic, isadaidbon nidaidën capuquidded cuesunepampid tantiaid Pascuas caid ushë choaidën-choaidënquien, Quënën nauedmiaid abentsëc nidmenu. ¿Mitsiquidimbi nidmepeque? Chui. Tantianu, quequin isadaidbo Pidaton chuided-chuidedpadenec. Adoaquien ismequin, Nëid nidme, cac nidmedenepadenec. ⁷ Aden chuidenequin ambi quënën nauedmiaid Badabas cuëmëdquid nepondash. Aidëmbi utsibobëdtan Domanobo bunenquiocquin cuesquin tauasho isun bedmeshun quënën nauedmepac caondash. ⁸ Adnubien Pidaton seta utsin quënën nauedmiaid abentsëc ambi nidmiondacaden nëbi adquid utsi nidmepatsiash icnui quequin tantiec Pidato yacno chopondash isadaidbo iccuededquido. Aden tantiec choash: —Quënën nauedmiaid abentsëcta mimbi nidmepatsia —quecuededpondash aido Pidato caic.

⁹ Adec onquesho tantiash Esus nidmetiadquiocquin Pidaton: —Mibi ancaquid caid, Esus, nidmependambi

iqueque. Isadaidbon, ëbi chui. Tantianu —capondash. ¹⁰ Esusbidi tsusio icpec matses quenushe quiash isadaidbo tsusiobo Esus unës uate bumpec quequin tantiaquin Pidaton aden chuipondash. ¹¹ Aden tantiec, ¿Adambi Esus nidme? quequin Pidaton chiac, Padi. Badabas nidmeta, quequin isadaidbo iccuededquin chuipondash aton tsusiobon chiacpadomboen. ¹² Aden chuibededaquien: —Badabas nidmequimbi mibi ancaquid caid Esus ¿atotsimbi napeque? Chui. Tantianu —capondash Pidaton.

¹³ Adoaquien: —Cueste nitsinshun dectan —quec comapenec cuëdcuededpondash isadaidbo.

¹⁴ Adoaquien: —¿Atotsi icsa uaosh? —quepondash Pidato.

Adoaquien: —Cueste nitsinshun dectan —queoaic comapenec cuëdcuededpondash.

¹⁵ Adsho tantiashe Esus ëmbi nidmeshe isun, Pidato icsambocquid nec, quequin ëbi chuiquid dapa isadaidbo tsusiobon chuiushe queshun Badabas nidmepondash. Adshumbic: —Cueshcaten Esus comapenen cuesmebedeshun cuesten dectanun buanec nid —capondash Pidaton sondado chuiquid chuiquin.

Sondadon Esus mamënshumbededaid chiaid

¹⁶ Adoac Esus bedshun Pidaton shubu umanuc daquënë uaid yacno sondadon buampondash. Aden buanshumbien sondado utsibo 600ted icnuc chomepondash. ¹⁷ Choshon dashcute abichobicquid bëdaidquio bedshun ancanquid dasiuidacbimboecnuc dasiuinshun pinchuc-pinchucquid mauete uashun Esus matoncashun ¹⁸ ancanquid cuënacpaden cuë nec: —Mibi isash bëdambo iquebi. Isadaidbo ancaquid dapa caid mibi neyoc —quequin Esus oncaic onquecuededpondash sondado. ¹⁹ Adoquimbi ancanquidën sanante cueste bëdaidquibimboecnuc sananquin sondadon

abentsëcshun-abentsëcshunquien Esus macuestanquin dacuishtucabudniash Esusën taëno danëshën sebudash uepondash. ²⁰ Aden mamënsumbededquin mëyanshun dashcute bëdambocquid ambi dasiuimboed dachicshun aton dashcutebi dasiunshun cuesten dectanuequin Esus buampondash.

Esus cuesten dectante chiaid
(*Mat 27.32-44; Duc 23.26-43; Uan 19.17-27*)

²¹ Aden abi dectante cueste Esusën buantiapimboenoc nidquimbi abi datanquid cueste chiadtometanquin buamepondash sondadon. Abi datanquid Sidene caid yacnocquid nëbi Edusaden caid dëuequiacnoësh choquid nepondash. Adecandedo, Dupo chedon papa Simon cuëmëdquid niondash. ²² Aden cueste Simonën buanubi macuësh Codocota caid yacno abitedi chopondash. Macuësh mapi canitebimboecsho Codocota quequin isadaidbon aton onqueten cuëmpondash. ²³ Ambo choshon uba sicaid paëacsho paëmbocquid dauë cacushtanquin meniac aquenquiocondash Esusën. ²⁴ Aden isuidsho isun cuesten dectampondash. Aden dectanshun aton dashcute bednu quequin sondadon abi cuëmëdquidtedi dada uabanshun tëchun sandoshon cadotanequin dada uatsaidëmpi puduemaiid isbanquin Esusën dashcute bedbampondash.

²⁵ Ushë dectatoec 9 yanuc Esus cuesten dectampondash. ²⁶ Esus dectanaid mapino dada uaid cueste podectanaid diadpondash. Isadaidbo ancaquid nec quequin dada uaid nepondash. Esusën naden chiosh quequin isadaidbo tsusiobon chiacpaden dada uaid nepondash. ²⁷ Cuesunetanquin ampequid daëd ëquë dectambudcuenshun nënantanquio Esus dectampondash. ²⁸ “Dectanquin icsaquidbëdta dectanendac,” quequin Nuquin Papan chuimiampicpadembi napondash. ²⁹ Aden

Esus dectanaid mapino abuc: “Isaidaidbo ancaquid nec” quequin dada uaid podectanaid diadsho isash, Adquidshenda diadpec, quequin tantiaquin datanquin mamënshumbededpondash. Adec cuenquin mamënshunquin: —Nuquin Papa tabadte shubu uashunaid chicbanshun daëdec ushquin chuca uaimbi, quequin chiec mibi onquiondaque. ³⁰ Abimbo chuiquid yec unëstiapimbocquid nebi quianec mibibi budta —cabidanepondash.

³¹ Aden cuenquidën chuinubi adembidi isaidaidbo tsusio dapabotedi tsusedpabon nadomboen nata quequin chiaid tantiamequid chedo onquecuededec: —Utsi-utsien bädamequimbi utsi unësacsho uincuemeboed yec mëtoccaid abembi chiquidtiapimbocquid nec —quepondash isaidaidbo tsusiobo Esus caic. ³² —Quidistu, Nuquin Papan chomiaid, isaidaidbo ancaquid nebi queboed mibibi bud. Mibi budaid isash, Quidistu nec, quequin tantiendambi —quepondash. Aden cuenquidën mamënshunubi abëdta dectanaidën adembidi chuioapondash.

Esus unës uate chiaid

(Mat 27.45-56; Duc 23.44-49; Uan 19.28-30)

³³ Adnubien ushë cuembocnoc 12 yanan inchëshquio icboedi ushë budec 3 yanuc uëshëmbo yanoapondash.

³⁴ Ushë 3 yanuc: —Eloi, Eloi, ¿lama sabactani? —quequin aton papa chiec Esus comapenec cuëdpondash. Aton onqueten: Papa Edoen, ¿atotsieshumbini bidiadquin isenquio ique? quec adpondash Esus.

³⁵ Aden Nuquin Papa Esusën chuisho tantiaquido, Nuquin Papa cuëneq, quenquio yec: —Edias cuëneque. Tantia —quepondash.

³⁶ Aden tantianubi badedi titinqueshun sicaid mucambocquid nēcushtanquin puntanquin cuate dēdectanshun acmenuequin ëccuëscadonequi: —Chiata. Edias Esus bedec chonoshe caimbono —quepondash.

³⁷ Adnubien comapenec cuëdec Esus unësbudpondash.

³⁸ Esus unësbudnubi abi inchëshacimbocnubi Nuquin Papa tabadte shubu uashunaid quënë uaid nuntan dectanaid dashcute bitsipambocquid tsincabudquin dectanac diadquid canchedbudcuempac caondash tembi daëdquio yec. ³⁹ Adec Esus cuëdbud-cuëdbudec unëso isash: —Abimbo chuiquid niosh. Nuquin Papan madombo nëid nec —quepondash sondado chuiquid uquë tsadbudec.

⁴⁰ Adnubien ancuenquio isec chidobo nëidtedi tabad-pondash: Madia Mactada caid yacnocquid; Madia utsi, Acobo bushcuctsëcquidën tita, aidi Osen tita nepondash. Utsibic Sadome nepondash. Aidon Esus ancuenquio diadsho isbededpondash. ⁴¹ Aidon Esus Cadidia caid yacno capusho isun abi nashumboedo nepondash. Aidobëdtan isquido chido utsibo Edusaden yacno choshon Esus buan-sho isun tsibanquido icpondash.

Esus chococate chiaid

(*Mat 27.57-61; Duc 23.50-56; Uan 19.38-42*)

⁴² Adashic biednes ushë budtsambi: —Inchëshbudtsëqui seis icnuc chonoadtemaid ushë chonoshe Esus unësoshe chococatanu —quianec Esus tantiaquid utsi nidpondash. ⁴³ Aidi, Ose Adimateya caid yacnoshon tishaid Pidato yacno nidpondash. ⁴⁴ Adec nidshun: —Esusën dada bedshun chococatiadquio iquebique. ¿Ada buantan mibi quepe? —caquien, ¿Ëndenda unësaccosh? quequin tantiesa icquin sondado chuiquid Pidaton chomeshun: —¿Ada Esus unësosh? —capondash.

⁴⁵ Adoac: —Ai —quesho tantiashun: —Ai, bedshun buanta —capondash Pidaton Ose chuiquin.

⁴⁶ Adoac nidshun unësaid dabidiate bedshun Esusën dada imbudshun dataneshun macuësh dapa cuënote

shëcuë uaquin ambi nacnenaidën nauedshun cuënote dapan bëtashpondash. ⁴⁷ Aden Osen Esus chococasho Madia Mactada caid yacnocquidbëdtambi Madia, Ose utsin titan ispondash.

16

Esus uincuenta chiaid

(*Mat 28.1-10; Duc 24.1-12; Uan 20.1-10*)

¹ Aden isashic sabado chonoadtemaid ushë inchëshbudtsëqui seis icnuc naimëdnubi Madia Mactada yacnocquid; Madia, Acobon tita; Sadome aitedi nidshun aton na bedtequid menequin comapenec noadte dadpen bedpondash Esus danoshcanuequin. ² Bedtsash badiadtsëcnubi dominco ushë caidën Esus chococacno nidanequi: ³ — ¿Tsuntsin cuënote shëcnepeba? — quec onquecuededpac caondash.

⁴ Adec onquequin ancuenquo isquien cuënote ënden shëcniac. Cuënote dapa yuëmbocquid nepondash. ⁵ Aden isequi nidash chococaid shëcuën puduedquin isaquien dada nëbi caniaid dashcute ushumbocquid dasiuidash abiucquo tsadpondash. Aidi isash dacuëdcuededec tabadpac caondash chidobo.

⁶ Adec dacuëdec tabadsho isun: —Dacuëdenquo yec tabad. Esus cuesten dectanaid mimbi nibënaid tantiemi. Uincuenash nidac. Nëmbobi nanac ueuidoshe. Is. ⁷ Nadoshi: “Cadidia caid yacno ëbia nidebi. Ambo nidshun ëmbi chiacpadomboen mimbi ëbi isendac, quiosh quequin nëmbo choacsho isun chuita,” Esusën caoshi. Nëbi ëmbi chiacpaden Petedo Esusbëd icquidquo utsi-bobëdta chuituidec nid —quepondash nëbi caniquid chidobo chiec.

⁸ Aden chuisho tantiash uëdëquequi chococaid shëcuënuësh puduenanec titinquec dacuëdec onquenquo yec nidanepac caondash chidobo.

*Esus abuc indote chiaid**(Mat 28.16-20; Duc 24.13-53; Uan 20.11-23)*

⁹ Adnubien abi nibëmboed uincuenshun Madia Mactada caid yacnocquidba Esusën ismetuidpondash. Ambi mayan icsa 7ted dapuduemiaid Madia Mactada yacnocquid nepondash. ¹⁰ Aden ismiac Esusbëd icboedo yacno nidash puduedshun aido shubisho Esusën abi ismiad Madian chuituidpondash. ¹¹ Esus uincuenash capusho isombi, Madia qesho tantias, Aidquio mimbi isambo iquec, quec tantienquo yec tabadcuededpondash.

¹² Adashic tantienquo yec tabadboed dada daëd Edu-saden yacnoësh podquedën nidsho Esusën chinumpon-dash. Chinunanec aidobëd nidanec puduedshun ismebempac caondash Esusën. ¹³ Aden ismiac aid daëdi aucbidi Edusaden yacno nidshun ambi isboed chuiopondash. Adembidi tantienquo icoapondash utsibon.

¹⁴ Adashic, abëd icquidquo 11ted pete sante cuesten tabadnubi Esus chopondash. Adec choshon: —Uincuenac quequin ëbi isquidon chiaid tantienquo mimbi icpoc. Chobique. Is —capondash Esusën.

¹⁵ Adashic: —Nëbi nidaidtedi yacno nidaneta. Adec nidshun Nuquin Papan shubu abentsëquën tabadtequid iquec, quequin matsestedi mimbítsen chuiban. ¹⁶ Aden chuisho tantiaquid, Ëbi cuidenquiocquin Esused Nuquin Papan cuidpanëdash. Adoac ëbi icsaid ënu, quequin ismenuequin acten mentomiaid abi yacno Nuquin Papan puduedmendac. Tantiesain Nuquin Papan cuidendac abi yacno puduedtiapimboconoc. ¹⁷ Abi tantiaquid utsi-utsien Nuquin Papan nadatiambocquin nabanquid icmendac. Adquid icmiadën ëmbi nacpaden mayan icsa dapuduemendac. Adembidi, utsi onquiaid tantienquiocboedëmbi tantiaquin ëbi chuibanendac. ¹⁸ Adecbidi, nisinquo pi-aqui bidisquenquo iquendac. Adecbidi, unësmenuequin

acmiaqui unësenquo iquendac. Adembidi, utsi unëstsen-
sho mishac bëdanendac. Nuquin Papan nadatiambocquin
namiaidënquo adobanendac —quepondash Esus.

¹⁹ Aden chuiquin ënacsho Esus abuc buanaqui
Nuquin Papan dayun abiucquo Esus tsadtuidpondash.

²⁰ Ambo tsadquimbi nadatiambocquin namiac nidaidën
tabadquimbi abëd icquido nidaid utsi-utsiec yacno
capuquin Nuquin Papan shubu abentsëquën tabadaid
chuibenepondash nadatiambocquin nabanquimbi.

Ëmbi abimbo chuiboedquo mimbi isec aidquo tan-
tianeta. Padi. Aidedi dada uaombi.

Esuquidistu Chuiquin Tantiamete
New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

